

**An Chiwinti yu Ts'o'lhi
San Marcos
yu Lhichiwiniy Jesucristo**

El Evangelio según
San Marcos
en el
Tepehua de Pisaflores



La Liga Bíblica

Las Sagradas Escrituras para Todos

Las ilustraciones por Louise Bass son propiedad de
©The British & Foreign Bible Society, 1994.

Primera edición 2004

Versión electrónica
San Marcos
Tepehua de Pisaflores
ISO-639-3 tpp

©**La Liga Bíblica, A.C., 2005**
México, D.F.

An Chiwinti yu Ts'o'lhi San Marcos yu Lhichiwiniy Jesucristo

An Juan yu ixjama'paxanan

1 ¹ Aniya a'taynilh an laj'oxi chiwinti yu lhichiwiniy Jesucristo, isTs'alh Dios. ² An tan ts'o'muk'ata an Isaias, yu ma'anchacha ixlchiwiniy ixchiwinti Dios, najun, tan manawnilh an Dios:

P'ulhnaj akmak'ana yu ka'ana lhichiwiniy an kinchiwinti para li kamala'asijnilhi min tij.

³ Chiwijlakaminkani an tan tu xamati wilh lakak'iwin, nawkan:

“K'ala'asijt'itcha, k'ala'oxit'itcha an ixtij an ay jamach'alhkat, oxicha k'ats'uk'ut'it.”



⁴ Pus an Juan, tsukulhcha jama'paxayi an lapanakni an lakak'iwin chi ixjalhixa'alaycha li astancha katanawlh, li katamakawlhcha ixtala'alhink'an, para li an Dios kajamala'mixinilhcha.

⁵ Pus wanajcha lhilhuwi ixtala'cha'an yu ixtaminachalh xalakaat'un Judea chi la'acha'an Jerusalén. Ixtanajuncha tuchini ixtala'alhinchak'an pus ixjama'paxaycha, tanchun ayxkan junkan Jordán. ⁶ An ixla'ch'it an Juan wa ixjaxe'at'an camello chi ixch'axpawilhcha a'xtam jaxe'at'an. Chi akxni ixwajin wa t'axkat yu alin lakak'iwini ix'uy chi sele' yu junkan camarón, yu tacha alin laka kuxtu. ⁷ Ixnajun:

—Xli'astan kamina pumatam yu palay alhp'asni, kit'in tuk'is ixt'achun, yucha masi li wa akta'antalhcha ak'o'x'otnilh ixwarachi, jantu ikt'acha'an. ⁸ Kit'in wa laka xkani klama'paxayaw pero yucha katama'paxayan la ixTakuwin Dios.

Ix'a'paxat Jesús

⁹ Walh la'atam wilhchan an Jesús minchalh la'acha'an Nazaret xalakaat'un Galileaj. La'cha'alhcha an Juan, juniy:

—Ak'ima'p'axat'i.

Pus an Juan ma'paxalhcha an Jesús, an ayxkan tan junkan Jordán. ¹⁰ Walh wa ixtakutt'ajunka an Jesús an lakxkan, la'ts'inchá an lakt'iyan tati'alh, chi ta'alhtajulhcha wa tacha la'atam paloma, uktawlhchalhcha, yucha an ixTakuwin Dios. ¹¹ Xli'astan chiwinkancha an lakt'iyan nawkan:

—Uxint'i kints'alhk'at'i, ikmapayniyan. Uxint'i iksakxtutan.

Lhila'ts'intanukani an Jesús

¹² Wa chuncha watukan lhi'alhi an ixtakuwin Dios lakak'iwin, ¹³ chi anchacha aklatsukuchalh t'up'uxam wilhchan, tan ta'alín ma'tilin. Chi an satanás ixlila'ts'intanuycha an Jesús. Akxni makawlhcha an satanás, tala'cha'alhcha an angelhnin chi ixta'a'tayjuycha.

An Jesús a'taynicha ixtapatsat an xalakaat'un Galileaj

¹⁴ La'puslichá wilhchan akxni an Juan ixmalak-lhchawkanta, an Jesús alh lhichiwiniy ixchiwinti Dios an xalakaat'un Galileaj. ¹⁵ Najun:

—Chilhcha panch'e'ex, an ixlich'alhkat Dios wanicha t'ajun, k'ak'iklak'a'itcha an ixchiwinti Dios jantucha ali k'a'ilht'ut'iti mintala'alhink'an.

An Jesús jat'asanilh ixt'at'ink'an ixch'apayawnan jatanti

¹⁶ Akxni wa nicha ix'antachalh xalakxkan Galileaj an Jesús jala'ts'ilh ixt'uyunk'an ixch'apayawnan jatanti ixtamujut'ajun ixpaxo'tank'an an lakxkan, yucha an Simón chi Andrés wa lhit'ala'awnin. ¹⁷ Jajuniy an Jesús:

—Akilat'a'awcha walh ixma'alhilanincha lapanakni akla'ilhtuyaw tacha ixjama'alhilayat'it jatantin.

¹⁸ Pus watukan tamakawlhi an ixpaxo'tank'an, tat'a'alhcha. ¹⁹ Lanancha ma'ati ixta'antalh, an Jesús jala'ts'impalh an Jacoboj chi an Juan, ists'alan Zebedeo, ixtalakch'it'ajun ixpaxo'tank'an laka barcoj.

²⁰ Jat'asanilh, pus tamakawchalhi an ixpayk'an Zebedeo laka barcoj ali an yu tat'atapatsay, chi tat'a'alhcha.

Pumatam lapanak yu ixlakpach'apata makxkay'un

²¹ Tacha'alhcha Capernaúm. Akxni ntu ixtapatsakan wilhchan ixmasuycha an Jesús laka tajtan. ²² Ixtalhi'a'nicha tacha an ixmasuy, mu yucha ixjamasuniy tachanu yu lhit'ajun lhich'alhkat, jantu tacha an xamaestrojnin lhamap'a'sin. ²³ Walh an laka tajtan ixtanun pumatam lapanak yu ixlakpach'apata makxkay'un, t'asaycha, ²⁴ najun:

—¡Jijwa! Jesús de Nazaret, ¿t'isunch'a la't'ant'a? ¿Wa kilamintawcha lalakt'ilhi'ulanin? ¡Jk'atsayi tichini uxint'icha, isTs'alhk'at'i Dios.

²⁵ Pero an Jesús la'a'aymalh, juniy:

—¡Wa sa'cha! ¡Lasch'a k'amak'aw ani lapanak!

²⁶ Pus an makxkay'un p'ascha lakchikixli an lapanak, chi p'ascha t'asalh, chi makawlhcha an lapanak. ²⁷ Pus sawalhcha ixtalhi'a'niya an yu ancha ixtatanumanalh, ixtalajuniy:

—¿Tisuncha aniya? ¿Tisu sast'icha lhamap'a'sini li layi jalaj'aymay an lakmakxkay'un chi ta'asmatniya?

²⁸ Watukan ta'a'pitsi'olhi an chiwinti chux Galileaj.

An Jesús k'uch'ulhi an ixput'icha'a'olh Simón

²⁹ Akxni tataxtulhcha an laka tajtan, ta'alhcha ixcha'a an Simón chi Andrés, ali an Jacoboj chi Juan. ³⁰ Walh an ixput'icha'o'olh Simón ixmalh, alhp'asni ixch'apata iskakat, pus tajunicha an Jesús. ³¹ Wachuncha yucha la'alh chi ma'ch'apasaklhicha, walh watukan makawlhi an alhp'asni iskakat chi laycha jamawacho'olh.

Wanaj lhuwi tatak'uch'ulh akxni ta'aknuchalhcha an wilhchan

³² Akxni tats'isilhcha wanaj lhuw ta'an'anini jalhicha'anikalh an Jesús chi yu wa ixtalakpachapay makxkay'un. ³³ Chux an lapanakni yu an tawilanalh an la'acha'an tacha'an'olhi an jatalakxtut. ³⁴ Pus tsukulhcha jak'uch'uyi an ta'an'anin, watuchicha ta'an'at ixtalhit'ajun, chi jak'uch'ulhcha wachu an yu wa ixtala'apaxto'ta makxkay'un, jantu ixjamakawniya katachiwinilh an lakmakxkay'un, mu ixtamispay.

An Jesús wats'isin tapayni

³⁵ Sawalhka wats'isin puts'istaka an Jesús ostayalh, taxtulhcha, alhcha tapaynini tan lakak'iwin. ³⁶ Walh an Simón ixpuxkajuycha chi an yu ancha ixtat'atamakajunta. ³⁷ Akxni tala'cha'alh tajuni:

—Wanaj siy tapuxkawyan.

³⁸ Yucha jajuniy:

—Ka'aw tan an wa lakwanicha lakwilakalh wachu aklhichiwinina ixchiwinti Dios, mu yucha ikla'minta.

³⁹ Pus ixlichiwinicha an laka laktajtan chux Galileaj chi ixjak'uch'uycha yu wa ixtala'apaxto'ta lakmakxkay'un.

**An Jesús lakak'uchulh pumatam
lapanak yu ixlakap'uch'i'ojota**

⁴⁰ La'cha'alh pumatam lapanak yu ixlakap'uch'i'ojotacha an Jesús, tats'o'ttanilhcha juniy:
—Li xak'ink'uch'up'ut'uka, ak'ink'uch'ut'ika lamapaynin.

⁴¹ Pus mapaynicha an Jesús, lats'awalalhi an ixmaka ukch'apachalhcha chi juniy:

—Chun, k'at'ala'a'oxit'icha.

⁴² Wachuncha junilh, watukan wak tala'a'oxilh.

⁴³ Xli'astan p'ascha watukani mala'achalh an Jesús.

⁴⁴ Juni y:


—Jant'u xamat'i k'a'un, wa k'ala'p'inchicha an sacerdotej. K'alhip'iniya'acha milha'ulan, li t'ala'a'oxit'icha, tacha najun Moisés para li katak'atsalhcha an ali'in li t'ak'uch'ut'icha.

⁴⁵ Pero yucha akxni alhcha, tsukulhcha laknajuni tani putapasalhcha, pus an Jesús xli'astan tucha wanaj lay ixtanuyachalhi ixlitalakasun an la'acha'an, wa ma'atcha istsukuyachalh tan wa la'asa'nik'a, pero wa tanchuncha ixtalakminachalh ixtala'cha'an.

**An Jesús k'uch'ulh pumatam lapanak
yu ixlakalhtukulunta**

2 ¹ Jantu la'alhuw wilhchani ixtaxtuta an Jesús, xli'astan cha'ancho'olhcha la'acha'an Capernaúm, walh watukan lajk'atsakalhi li ma cha'ancho'otacha.

² Pus watukan lhuwi tata'ayxto'lhi, tucha ixtalhilayi masi wa jatalakxtutcha, chi ixjalhixa'alaycha an ixchiwinti Dios an Jesús. ³ Walh tichi yu'uncha ixt'at'ink'an lapanakni tach'ixlicha'anilh pumatam lapanak yu wa ixlakalhtukulunta. ⁴ Pero ntu lay ixtala'cha'ani wani mu lhilhuw, pus ta'a'stilhukukulh lakats'uniya an cha'a'. Anchacha taputamaknulh la ixputamat an



yu lakalhtukulunta. ⁵ Akxni jala'ts'ilhcha an Jesús li tajakiklaka'inin, junicha an yu lakalhtukulunta:

—Ikmala'mixiniyancha mintala'alhini kints'alh.

⁶ Walh mu ancha ixtawilanalh an ali'in xamaestrojnin lhamap'a'sin, pus sa'cha ixtalhatapastakan: ⁷ “¿Tasu li chunchacha najuni? Wa aya najun, wa Diosi lay mala'-mixiy tala'alhin. ¿Tisiyuchacha lay kamala'mixipala tala'alhini?” ⁸ Wayu mu an Jesús ixjak'atsaniya tani ixtapast'ak'acha, jajuniy:

—¿T'asu li ch'unch'ach'a jat'ap'ast'aknanat'iti?

⁹ ¿Tanyucha yu palay jantu lhima'anxkay ajkunilh:

“Amintala'alhin ikmala'mixinincha”, u ajkunilh:

“K'at'aycha k'asakt'icha amimputamat k'ap'inchicha”?

¹⁰ Chaway kit'in yu ikwalh isTs'alh lapanak aklamasuniyawli li layi ikmala'mixiy tala'alhin ani lakamunulhpa'. Junilh an yu lakalhtukulunta:

¹¹ —Chaway uxint'i ijkunan k'a'ost'aycha, k'asakt'icha amimputamat chi k'ap'inchicha mincha'a'.

¹² Pus ostayalhcha an yu ixlakalhtukulunta, chi saklhicha an ixputamat, tala'ts'in'ojoycha, pus sawalhcha talhi'a'niy, tanajun:

—Tu a'tam ixla'ts'intawi tacha aniy. An Dios ay sawalh.

T'asanikan an Leví

¹³ Xli'astan an Jesús ampalhi an ixpiktu lakxkan, anchacha ixjamap'a'siy mu lhuw lapanakni ixtala'cha'an.

¹⁴ Tan ixla'pust'ajun an Jesús la'ts'ilh an Leví, ists'alh Alfeo, sa' ixwilh tan mapalhlhi'ankan ixlakata tanlhun, pus juniy:

—Ak'int'ap'it'icha.

Walh t'a'alhcha. ¹⁵ Xli'astan an Jesús chi an ixt'alhtanan ixtat'awilanalhcha la ixmesaj an Leví, la ixcha'a, ixluwk'an wachu ixtat'awilanalh an yu ixtalhach'inin tanlhun chi, an yu ixtalhit'ajun ixtala'alhink'an, mu wanaj lhilhuwi ixch'a'o'akanta an Jesús. ¹⁶ Pus an xamaestrojnín lhamap'a'sin chi an fariseojnín tala'ts'incha li tat'alakwajini an Jesús an yu talhach'inin tanlhun chi an yu talhit'ajun ixtala'alhink'an, pus jajunkancha an ixt'alhtanan Jesús:

—¿Tasu li jat'alakwajincha an yu talhach'inin tanlhun chi an yu talhit'ajun ixtala'alhink'ani?

¹⁷ An Jesús asmatlhi, jajuniy:

—Yu oxi tat'ajun jantu tama'lhtask'iniya jak'uch'unu', yu tata'an'ay chun. Kit'in ikminta jat'asanini an yu talhit'ajun ixtala'alhink'an, jantu yu oxi tat'ajun.

Tuchi ixlakatacha akxni ntu waykan

¹⁸ An ixt'alhtanan Juan chi an fariseojnín tu ixtawajini a'tamin. Chi tala'alh an Jesús tajuni:

—¿Tasu li an ixt'alhtanan Juan chi an fariseojnín tu tawajini a'tamini, chi amint'alhtanan yu'uncha tawajini?

¹⁹ An Jesús jajuniy:

—¿Chu laycha ntu katitawaylh yu tat'ajun tan tama'xto'kan? Li anchaka tat'ayanalh an yu tama'xt'o'a

ntu layi ntucha katitawaylh. ²⁰ Pero kamina wilhchani akxni an yu tama'xto'lhi ntucha ani katitsukulh. Akxni ntucha katitawaylhi a'tamin. ²¹ Jantu xamati ts'ap'a-muk'aniy yu sast'ika la'ch'it yu at'ilhcha la'ch'it, li chuncha, an yu sast'ika la'ch'it wa palay exa an yu at'ilhcha. ²² Chi ntu xamati mujuy yu sast'ika xaxkan uvaj laka at'ilh jaxt'a'an, li chuncha, an sast'i xaxkan uvaj laj'exa an jaxt'a'an, pus pu'ancha an xaxkan uvaj chi an jaxt'a'an talaj'exacha. Yu sast'ika xaxkan uvaj laka sast'i jaxt'a'ani kamujukalh.

**An ixt'alhtanan Jesús ixta'akatan'ex'i
trigoj akxni ntu tapatsakan**

²³ La atam Sábadoj ixla'pust'ajun tan jach'ananankanta an Jesús, walh an ixt'alhtanan tsukulh ta'akatan'ex'iya an trigoj. ²⁴ Pus an fariseojnin tajuni an Jesús:

—K'ajala'ts'i, ¿tasu li chunchacha talayi, li yu chaway ani wilhchan tu tapatsakani?

²⁵ Yucha jajuniy:

—¿Jant'u a'tam p'unawt'at'iti tani lalhcha an David chi an yu ixtat'a'anta akxni tachawanilh; ²⁶ tani lhitanulhcha an la ixcha'a Dios akxni xa'ay sacerdotej ixjunita an Abiatar, chi ulhi an jasantujlanti pan, walh tulay xamati ix'uy, wa yu'uncha an sacerdotejnin, walh an David wachu jat'a'ulhi an yu ixtat'a'anta?

²⁷ Chi jajumpalay:

—An wilhchan yu ntu tapatsakan ilhtukalh ixlakata an lapanak, jantu ilhtukalh an lapanak ixlakata an wilhchan yu ntu tapatsakan. ²⁸ Xliyu kit'in yu ikwalh isTs'alh lapanak layi k'ilhtuy tanlhun masi akxni jantu tapatsakan wilhchan.

**Pumatam lapanak yu ntu lay
ixlak'anuy ma'atam ixmaka'**

3 ¹ A'tam tanupalhi an Jesús an laka tajtan, walh ancha ixtanun pumatam lapanak yu ntu lay ixlak'anuy ma'atam ixmaka'. ² Chi mu akxni xawilhchan

jastaknat, an yu ixtaxkaji an Jesús sawalhcha ixtalhist'ak'a li katapujuya kamajk'uch'uya an lapanak, para li katapu'alhtasulh. ³ Walh an Jesús juniy an lapanak:

—K'at'aycha, tan'ajnich'a k'at'ay.

⁴ Chi jalhisakmilhcha an ali'in an Jesús, jajuniy:

—¿Oxi li ka'ilhtukalh yu oxi tu'u ani xawilhchan jastaknat? ¿U ani wilhchan ixpu'ilhtukan yu ntu oxi? ¿Ani wilhchan layi akma'alhtaxtunilh jatsukunti, u akma'nilh?


Jantu xamati alhtaylh. ⁵ Pus talh'amancha jala'ts'in an Jesús chi lhita'oxila'alhicha li yu'uncha ntu talhkapu'ani li kataja'a'tayjunulh, juniy an lapanak:

—K'alats'awalat'icha amimaka'.

Walh lats'awalalhcha, tamaj'oxilhcha. ⁶ Wachuncha tataxtulhcha an fariseojnin ta'alhcha lhilakchiwinin ali an herodianojnin tani katalhima'nilhcha an Jesús.

An ixpiktu lakxkan lhuw lapanakni tacha'alh

⁷ Walh an Jesús chi an ixt'alhtanan ta'alhcha ixpiktu an lakxkan, lhuw lapanakni tama'alh. Jamacha'an Galileaj, chi Judea, ⁸ chi Jerusalén, chi Idumea, chi ixlitapiktutamcha an ayxkan Jordán, chi la ixtunta-la'acho'ocha an la'acha'an Tiro, chi Sidón, lhuw lapanakni tala'cha'alh, mu ixta'a'smat'acha li laj'ay tanlhuni ix'ilhtuy. ⁹ An ixt'alhtanan jajuniy li katamala'asijninilh la'atam barcoj, para li ntu katapa'asilh, mu wanajcha lhilhuwi



ixjunkanta. ¹⁰ Ixluwchak'ani ixjak'uch'uta pero an ali'in yu wachu ixtata'an'ay ixtalakask'in wachu masi wa kaxta'aych'apachalhcha, wa ixtaputamacho'oycha.

¹¹ An lapanakni yu ixtalakpach'apata makxkay'un akxni ixtala'ts'incha an Jesús ixtata'a'tso'ottanicha chi p'ascha ixtachiwini, ixtanajun:

—Uxint'i isTs'alh Dios.

¹² Pero yucha sawalhcha ixjalaj'aymayi para li ntu katanawlhi tichini yuchacha.

Jasakxtukan ixpumakawt'uyk'an yu talhichiwiniy ixchiwinti Dios

¹³ Xli'astan alhcha a'stitawk'a an Jesús, chi anchacha jat'asanichalh yu yuchacha jat'asaniputulh, pus tala'cha'alhcha. ¹⁴ Ixpumakawt'uychak'ani jasakxtulh yu katat'alhtanana chi kajamak'anacha kata'ana lhichiwinin ixchiwinti Dios. ¹⁵ Ja'ilhtulhcha li layi katatamakxtuya lakmakxkay'un: ¹⁶ An ixpumakawt'uyk'an chunchuniya ixjajunkan: Simón, yu wachu junikalh Pedroj, ¹⁷ chi Jacoboj, chi Juan, sts'alan tichi lapanak junkan Zebedeo, yu'uncha jalhimapa'a'ulh Boanerges, nawputun ists'alan xalapanak xkan, ¹⁸ chi Andrés, chi Felipe, chi Bartolomé, chi Mateo, chi Tomás, chi Jacoboj, ists'alh Alfeo; chi Tadeo, chi Simón yu ixjach'a'o'ay yu partido Cananista. ¹⁹ chi Judascha Iscariotej, yu an ma'axta'lhi Jesús.

Yu wa aya lhichiwiniy an ixtakuwin Dios

Xli'astan ta'alhcha lakatam lakacha'a'.

²⁰ Wanajcha lhilhuwi jumpalakah, tuchalayi masi wa katitalakwaylhcha. ²¹ Akxni an ixt'alalhila'ts'inin Jesús tak'atsaalh, ta'alhcha puxkawnini an Jesús para li katalhi'alhcha, mu ixtalaknajun ma wa locojlaycha.

²² Ixpulaknicha cha'a an xamaestrojnin lhamap'a'sin, yu ixtamintachalh Jerusalén ixtanajun:

—Ta'asmatnicha an lakmakxkay'un mu yucha an xapay makxkay'uni t'atapatsay.

²³ Pus jaxa'alalhi an Jesús, chi tsukulhcha jajuniya tacha laycha talhimacha'xay, jajuniy:

—¿Tasicha lay kalhitamakxtukana wa ix'akstucha an satanasi? ²⁴ Li la'atam lhich'alhkat wa lapu'aykan, yucha ntu a'tam oxi katitaylhi'alh, ²⁵ chi lakatam laka cha'a, li wa siya yu'unchacha wachu tala'ajiy, katatalakt'ilhitawla'. ²⁶ Chi mu li an satanás wa ix'akstucha t'ala'aykan, jantu layi katitaylhi'alh, yucha ixputs'an'ancha. ²⁷ Jantu xamati lay an tanunu la ixcha'a xamati lapanak yu k'ut'ilh, li ntu p'ulhnajcha ma'ch'imay chi xli'astan ka'alhawniyacha an ixtanlhun. ²⁸ Klajunaw yu sawalh, watuchicha tala'alhin kamak'akxanikana an lapanak, wa tani lhichiwinintacha an Dios. ²⁹ Pero watichicha yu wa aya lhichiwiniy an ixTakuwin Dios, jantu a'tam katimala'mixinikalh, yucha ixpujun'alhincha kuna tach'in. ³⁰ Chuncha jajunilh mu ixtajuni li ma makxkay'uni ixlakpach'apata.

An ixnati Jesús chi an ixjat'ala'awnin

³¹ Akxni tacha'alhcha an ixnati Jesús chi an ixjat'ala'awnin an tan ixtanumalh, tamala'achalhcha pumatam li ka'alh t'asanini'. ³² Pus tacha an ixtala'acho'owilananilh, tajuni:

—Ma tapuxkawyan an mijat'ala'awnin chi an minati.

³³ Yucha ja'alhtaylh jajuniy:

—¿Tisiyuchacha kinati chi kijat'ala'awnini?

³⁴ Pus sa'cha jala'ts'ini an ixtala'acho'owilananilh, jajuniy:

—Uxitnani tacha kinati chi tacha kijat'ala'awnin, ³⁵ mu wa tichicha yu ilhtuyi tacha an najun Dios, yucha kint'ala'ajun, kijamatsan chi kinati.

Pulhamacha'xan jach'anana'

4 ¹ A'tamcha tsukulh jamasunipalayi an Jesús la ixpiktu an lakxkan, walh wanajcha lhilhuwi ta'ayxto'palakalh pus tajulhcha lakatam laka barcoj anchacha sa' tawlhchalh chi chux an lapanakni ixpiktucha an lakxkani ixtayanalh. ² Yucha sawalh



ixjalhixa'alay tu'u tacha yu lay katalhimacha'xalh yu ixjamasuniputun, tacha ani jajunilh:

³—A'tamchacha pumatam lapanak alh jach'anana'.

⁴Walh akxni tsukulhcha ch'an, an ali wa laka tiji tamachalh, pus ta'usaklhi an ts'o'on. ⁵An ali lakachiwxini tamachalh, tan tutukancha lhiyalh t'un, pus wa tukancha la'awlh, mu ntu talhmani yu t'un. ⁶Akxni xajchilhcha an wilhchan, la'xlo'lhi chi lakxixli, mu ntu tu'u ixjataxiyak.

⁷An ali lakalhtukunani tamachalh, walh ta'ayalhi an jalhtukun, pus maxixilh, jantu tawk'anilh xajatawk'at.

⁸Pero an ali tan oxi t'uni tamachalh, la'tampa'lhicha chi ta'ayalhcha. Tawk'anilhcha xajatawk'at, lhuwcha talhawalh. Wa la'atamin xatalhts'i alilhcha yu xta'cho'olhcha treintaj chi sesenta chi tamcientojcha xatalhts'i.

⁹Chi jajuniy:

—Yu lhit'ajuni ixpa'asmatna ka'asmatlhi.

**Tuchini lhima'lhtask'inicha an
pulhamacha'xan an Jesús**

¹⁰ Akxni wa ix'akstucha tamakawlh, an yu wa niy ixtayanalh chi an ixpumakawt'uyk'an ixt'alhtanan talhisakmicha tuchini nawputuncha. ¹¹ Pus jajuniy:

—Uxitnan layi k'alhimach'a'xaya'it an yu ntu tasuy ixlich'alhkat Dios, pero an yu ma'spa tat'ajun wanaj wa laka pulhamacha'xani jajunkan, ¹² mu masi tala'ts'incha, tachanu ntu tala'ts'in chi masi ta'asmat'acha jantu talhimacha'xay, pus tu layi jamala'mixinikan ixtala'alhink'an mu ntu tach'a'o'ayi Dios.

An Jesús najuni tuchini jumputuncha an jach'anana'

¹³ Chi jajuniy:

—¿Jant'u lhimach'a'xayat'iti an tacha klajuniw?, ¿chuncha tasicha k'alhimach'a'xaya'it an ali'i? ¹⁴ An jach'anana yucha an yu lhichiwiniy ixchiwinti Dios, ¹⁵ chi an yu wa laka tij tamachalh jach'ananti yu'uncha an yu jalhixa'alakanha, pero akxni ta'asmattacha, an satanás jamak'ap'apalaycha la ixjalhunutk'an. ¹⁶ Wanajcha chuni an yu wa lakachiwxin tatamachalh, mu masi sawalhcha ta'achaniy ta'asmat'a akxni jalhixa'alakan, ¹⁷ jantu tajataxiyaklay, wa putamcha pants'ik'is, mu akxni lhima'anxkaycha talhiwilay u jalhich'a'o'akanha ixlakata an ixchiwinti Dios, tamakawcho'oycha. ¹⁸ An yu lakaalhtukunan tamachalh, yu'uncha an yu ta'asmat'acha, ¹⁹ pero mu sawalhcha talhkapu'ani tacha an lak'alinha tanlhun, pus taputa'o'xcho'opalaycha, la ixlhitsukuputunka lhuw tumin, chi chux tacha an lak'alinh tanlhun. Pus chux ani tanlhun maksk'anjwacho'oyi an ixchiwinti Dios takapcho'oycha, jantu tu'u ta'ilhtuy yu laj'oxi. ²⁰ An yu tan oxi t'un tatamachalh, yu'uncha an yu ta'asmat'acha ixchiwinti Dios chi takiklaka'i, pus lhuwcha talalalhaway, wa pumatamjtain, alincha yu treintaj, sesenta chi cien xt'a'a ixjatawk'at.

Jantu tu'u yu ntucha katik'atsakalh yu ntu k'atsakan

²¹ Wachu jajumpalay:

—¿Chu sna li mapulhkukan pumaklhku, la ixtan'apicha putamati tamaknukan? ¡Jantu!, yucha muk'akanha tan oxicha kamapulhkuh. ²² Jantu tu'u yu ntucha lay katik'atsakalh yu ntu ixk'atsakan, chi ntu tu'u yu ntucha katimalakasukalh tan putunku. ²³ Li xamati lhit'ajun ixpa'asmatna, ka'asmatlhi.

²⁴ Chi jajumpalay an Jesús:

—K'alhak'ap'up'it'iti an t'ach'a asmat'at, mu t'ach'a p'alhk'ananat, ch'unch'a k'ap'ulhk'ak'ana'it, chi palay k'alhimo'slanik'ana'it'iti an yu asmat'at. ²⁵ Mu an yu lhit'ajun palay kajama'lhtayanana', pero an yu ntu lhit'ajun, masi wa lakats'unicha ixlitsukulh kamaxtuni'okana'.

Pulhamacha'xan tani lhita'ayaycha xatalhts'i tu'u'

²⁶ Ixnawpalay:

—An ixlich'alhkat Dios tacha xamati lapanak yu jach'ananan. ²⁷ Puts'ista lhtatay chi wats'isin ostayapalaycha. An yu ch'anta tamp'a'acha chi ta'ayaycha, pero yucha ntu k'atsayi tani lhita'ayaycha. ²⁸ An lakaat'un ix'akstucha ma'alay an jach'ananti, p'ulhcha taxtuniya xax'oy, p'a'acha xli'astan tawk'anicha xajatawk'at. ²⁹ Chi li akxni li oxicha k'at'ata, p'uxacha an lapanak, mu ixpakucha chi cha'xmaj'ancho'oycha.

Pulhamacha'xan xatalhts'i mostaza

³⁰ An Jesús wachu jajumpalay:

—¿Tasicha lay aklalhimalakxtuniw an ixlich'alhkat Diosi? Chunchuni: ³¹ Tachanu la'atam lakat'ikt'i xatalhts'i mostaza, masi yucha wanaj wa lakat'ikt'i, ³² apalij yucha yu palay ay lhtinin ta'ayay, tan tamuk'aycha ixpamaj'ank'an an ts'o'on chi tapamalhk'iknincha.


**Tuchini la'lhima'lhtask'inicha an
Jesús an pulhamacha'xan**

³³ Tamj tamjcha ixjalhimalakxtuni an Jesús, tacha laycha ixtalhimacha'xani yu ixjajumputun. ³⁴ Li ntu tu'u ixjalhimalakxtuni para lay katalhimacha'xanilh, jantu ixjaja'alay. Pero li akxni wa la'stu an ixt'alhtanan ixtat'atawlay ixjajun'ojoy, mu yu'uncha ixtalhimacha'xay.

An Jesús sa' ulalh an p'as un chi xkan

³⁵ Akxni ta'oxalhcha jajuniy an ixt'alhtanan:
—An ixtakilhtutamcha an lakxkani ka'aw.

³⁶ Pus jamakawyawlhcha tacha an lhilhuw ixlakya-kalh, tatajuhlcha an laka barcoj, ta'alhcha. Ali barcoj ixtach'a'o'alhi'anta. ³⁷ Walh tsukulh lay ay p'as un, an xkan tsukulhcha putajuyi an barcoj, ixtalak'aknut'ajuncha. ³⁸ An Jesús ilhtatajtajumachalh la ix'istaj an barcoj, ix'a'ts'inta ix'a'ts'i. Mu sawalhcha ixtalaktalhanan tamakujulhcha an ixt'alhtanan, tajuni:



—Maestroj, talak'aknut'awnawcha uxint'i nt'u lhak'ap'up'in.

³⁹ Pus ostayalh, la'a'aymalhi an p'as un chi an xkan, juniy:

—Sa'ch'a k'at'a'ulh chi sa'ch'a k'ak'ilhu.

Pus wanaj sa' tawlhcho'olh. ⁴⁰ Chi jajuniy an ixt'alhtanan:

—¿T'asu li sawalhch'a lakt'alhananat'iti, ch'u nt'u jak'iklak'a'ininat?

⁴¹ Pus sawalhcha ixtalaktalhanan, ixtalajumpaxay:

—¿Tisiyuchacha ani li an un chi an xkan ta'asmatniya?

Lapanak yu ixlakpach'apata makxkay'un jamacha'a Gadara

5 ¹ Tacha'alhcha ixtapiktutam an lakxkan la ixlakaat'unk'ancha an jamacha'an Gadara. ² An Jesús takutlhicha an laka barcoj. Walh xajnichilh pumatam lapanak an kampusantuj yu lakpach'apata makxkay'un. ³ An tan ixlak'aknukani ixtawlay, chi ntucha xamati lay ixch'i'ulay masi laka kadenaj. ⁴ Mu a'lhucha ixch'i'ulkan laka kadena pero ixlaj'ex'ulay, pus tu xamati lay ilhajay. ⁵ Stakcha ixt'asajtsukuyi tunku chi puts'ista an lakak'iwin chi an kampusantuj. Chi ixlakamak'atsanikancha laka chiwx. ⁶ Walh, akxni la'ts'inkalhcha an Jesús akxni ma'atka ix'antachalh, la'ats'alaj'ankalhcha chi tats'o'ottanikalhcha. ⁷ P'ascha ixa'alakan an Jesús, ixjuncan:

—¿Jesús, isTs'alh Dios yu wilhchalh lakt'iyán!
¿Tasicha k'ilhtuyani? Iksk'iniyan la ixtalakask'i Dios,
jantu ak'imama'alh'ajnit'i.

⁸ Chuncha ixnajun an makxkay'un mu an Jesús juniy:

—Makxkay'un k'amak'awcha ani lapanak, ⁹ ¿tasicha unk'an? —juniy.

—Legión, mu wanaj kilhuwk'an —najun.

¹⁰ Sawalhcha tapayniniya an makxkay'un an Jesús li ma ntu kajatamakxtulhi an tan tat'ajun. ¹¹ Chi mu

wani ancha ixta'ex'wayt'ajun lhuw p'axnin. ¹² Pus an lakmakxkay'un tatapayninicha an Jesús, tajuni:

—Yu'uncha an p'axnincha ajkalakpach'apayaw.

Anchacha akilamak'aw.

¹³ Jamakawnilhi an Jesús, pus tamakawlhcha an lapanak. Yucha an p'axnincha talakpach'apalh, ka tacha la'at'uy milh p'axnin. Talakats'alaj'alhi an p'axnin an tan a'talhman chi tata'aj'ajulh, chi talaj'aksk'anj'u'olhi an lakxkan. ¹⁴ An yu ixtalhist'ak'a an p'axnin talakats'alalhcha chi ixtajunicha masi yu wa intacha jalhi'ay ixtapaxt'o'a an tacha tapasalh chi an la'acha'an ixtalaknajuncha wachu'. Pus ta'alhcha la'ts'inini tuchini tapasaycha. ¹⁵ Tala'cha'alhcha an Jesús, chi tala'ts'incha an yu ixlakpach'apata makxkay'un tan sa'cha ixwilh, ixmala'ch'inincho'otacha, oxicha ixjalakpastaknancho'oy, pus ixtalaktalhanancha an lapanakni. ¹⁶ An yu tala'ts'ilhi tani tapasalhcha an yu ixlakpach'apata makxkay'un, tat'alajunicha an ali'in, chi tani talalhcha an p'axnin. ¹⁷ Pus sawalhcha tatapayniniya an Jesús li ma ka'ancho'olhcha. ¹⁸ Akxni tajucho'olhcha an laka barcoj an Jesús, an yu ixlakpach'apata makxkay'un sawalhcha tapayniniya li ma kat'a'ana'. ¹⁹ Pero an Jesús jantu makawnilh, yucha juniy:

—K'ap'inchicha mincha'a'. K'ajala'p'inchicha yu t'ajalhila'ts'in, k'aja'una'acha li an Dios yucha k'uch'un chi li yucha mapaynin.

²⁰ Pus alhcha, chi tsukulhcha laknajuni an xala'acha'anaxni Decápolis tani lhik'uch'ulhcha an Jesús. Sawalhcha ixtalhi'a'niy.

Pumatam lapanak junkan Jairo lhitapaynisk'in istsi'

²¹ Akxni pupatakutch'o'ochalhcha an barcoj an Jesús an ixtakilhtutamcha lakxkan, lhuwcha tala'cha'ampalh. Pus wanicha an ixkilhtu lakxkani ixt'ajun. ²² Walh la'cha'alh pumatam lapanak yu ixjunkan Jairo, yu ixla'ts'ilhi'an laka tajtan, tatso'ottanilhcha an Jesús.

²³ Sawalhcha tapaynini, juniy:

—An kints'i nit'ajuncha. Ak'int'ap'it'i. K'alakp'ach'ap'aya'a para li kata'oxilh.

²⁴ Pus an Jesús t'a'alh. Lhilhuwi ixch'a'o'akanta, wa ixtapa'asicho'oycha.

An Jesús k'uch'ulh pumatam t'aku'

²⁵ Pumatam t'aku la'akawt'uycha k'ata ixta'an'ay, wa ixmaj'an ixjak'alhni. ²⁶ Jantu layi ixta'oxiy masi ix'ancha laka jak'uch'unun, apalijcha wa ixlita'o'slay, chi ixmakamin'ojotacha ixtumin. ²⁷ Akxni asmatlhi li tanchuncha t'ajun an Jesús, ch'a'o'ayawlh, japujatanulhi an lapanakni chi ch'apanichalhcha an ixla'ch'it. ²⁸ Mu ixnajun: “Masi wa akch'apanichalcha an ixla'ch'it, aktak'uch'uya'.”



²⁹ Walh watukan sa' aninilhi an ixjak'alhni, oxicha lakak'atsancho'olh li ta'oxilhcha tacha an ixma'alh'ajnajt'ajun. ³⁰ Xli'astan an Jesús mu k'atsayi li xamati k'uch'ulh. Tala'asp'itlhi, jajuniy:

—¿Tisiyuchacha kinch'apanichalh an kila'ch'it?

³¹ An ixt'alhtanan tajuni:

—Pero sawalhcha tapa'asiyan ch'i lhasakminini tichini aych'apacha'ancha.

³² Pero yucha sa'cha jalakawanani tichini yuchacha kawalh. ³³ Pus an t'aku xk'ip'ip'icha lay talhanancha, mu k'atsaycha tacha tapasalh, pus la'alh, tatso'ottanilh an Jesús, chi jun'olh. ³⁴ An Jesús juniy:

—An mijakiklaka'inti p'ut'ak'uch'ut'icha kintsi', lhi'achacha k'ap'inch'o'ochi mu t'a'oxit'icha.

Mala'awnicho'olhi an Jesús an istsi Jairo

³⁵ Walh ixchiwint'ajunka an Jesús, tacha'alhcha yu taminchalh la ixcha'a an yu ixla'ts'ilhi'an laka tajtan, tajuni:

—Amintsi ts'an'alhcha. T'uch'a ali k'ama'ach'ap'u an Maestroj.

³⁶ Walh mu asmat'a an Jesús, pus juniy an yu ixla'ts'ilhi'an laka tajtan:

—Jant'u k'at'alhan. Wa k'ak'iklaka'incha.

³⁷ Chi ntu xamati makawnilh li kat'a'alh an Jesús, wa yucha an Pedroj chi Jacoboj chi Juan ixt'ala'ajuncha an Jacoboj. ³⁸ Ta'alhcha la ixcha'a an yu ixla'ts'ilhi'an laka tajtan. An Jesús jala'ts'incha tacha sawalhcha tala'ta'oxila'alhi chi wa tilh tilhcha talay chi talaj'alhuncha. ³⁹ Pus jala'tanuchalh an Jesús, jajuniy:

—¿Tasu li wa tilh tilhch'a layat'iti ch'i laj'alhunatcha? An jatsi ntu nita, wa lhtatay.

⁴⁰ Pero yu'uncha wa ixtalhitsu'i'in. Pus jatamakxtu'olh, wa yucha an ixpay chi an ixnati jatsi, chi an yu ixtat'a'anta an Jesusi tat'atanulh an tan ixmalh an jatsi'.

⁴¹ Ma'ch'apachalhi an jatsi an Jesús, juniy:

—Talita kumi —yucha nawputun: Jatsi', uxint'i ijkunan, ¡k'a'ost'aycha! ⁴² Watukan ostayalhi an jatsi, tsukulhcha jalhtanan. Mu la'akawt'uycha k'ata ixpak-xanta. Chi sawalhcha ixtalhi'a'niya an lapanakni an yu tala'ts'ilh. ⁴³ Wachuncha jajuniy an Jesús li ntu xamati katajunilh tacha an tala'ts'ilh, chi lhinawlhcha li kamawakalhcha an jatsi'.

An Jesús jantu tala'a'iy an la'acha'an Nazaret

6 ¹ Taxtulh an Jesús, jat'amilhcha la ixt'un an ixt'alhtanan. ² Walh sabadojcha walh, akxni ntu tapatsakan tsukulhcha masuyi an laka tajtan. Lhuwi yu sawalhcha ixtalhi'a'niy. Ixtanajun:

—¿Tani laklanilhcha an jatapast'ak'at chi tacha an jak'uch'ununcha la ixmaka'a? ¿Tisu jatapast'ak'atcha ani xta'nikanta? ³ Pero mu yucha an jaxpitni', an ists'alh María, an ixt'ala'ajunk'an Jacobo chi José chi Judas chi Simón chi an ixjap'isa'an wachu aniya tawilanalh.

Tucha oxi ixtalhiwilay an Jesús an lapanakni. ⁴ Pus an Jesús jajuniy:

—Jantu xamati yu lhichiwiniy ixchiwinti Dios la'ts'inputunkan la ixt'un chi la ixt'alalhila'ts'inin chi la ixcha'a'.

⁵ Pus tu tu'u lay ilhtulh ancha tu'u yu laj'ay tanlhun an Jesús, yu masuy ix'alhp'asninti an Dios, wa ali'in ta'an'anini jak'uch'ulh yu jalakpach'apalh. ⁶ Wachuncha sawalhcha lhi'a'niya an Jesús li ntu k'is tajakiklaka'inini yu'uncha. Ix'anचा masunu an lakt'ikt'i la'acha'anaxni.

Jamala'pitsilhcha an ixpumakawt'uyk'an ixt'alhtanan an Jesús

⁷ Jat'asanilhcha an ixpumakawt'uyk'an ixt'alhtanan an Jesús, chi tsukulhcha jamala'pitsi ixpumat'uyunk'an. Ja'ilhtulhcha li layi katalhajaya an tanlhuncha lakmak-xkay'un. ⁸ Jajuniy li ntu tu'u katalhi'alh, ixnik'an, chi ixbolsajk'an chi tumin, wa ma'atamin ixpalikk'an, ⁹ chi ixwarachijk'an, pero ixlamapaxank'an jantu. ¹⁰ Jajuniy:

—Wa t'anch'unch'a k'ach'ip'ina'it laka cha'a wa anch'ach'a k'at'awla'it, sta akxni k'at'axt'uch'o'oya'it an la'acha'an. ¹¹ Chi wa t'anch'unch'a nt'u la'a'ik'angat, u nt'u asmatnik'angat, akxni t'axt'uch'o'oyatcha, k'ach'an-k'alhap'uxk'ana'it'iti an po'xmi para li katak'atsaalh, mu yu chuncha talay jantu ta'asmatputun, palay

katama'alh'ajnanana akxni ka'ukla'oya, walh masi an la'acha'an Sodoma chi an la'acha'an Gomorra palay wa xlak'anti katama'alh'ajnanana'.

¹² Pus tataxtunilhcha, ixtanajuncha li katamapaxalhcha ixjatapast'ak'atk'an an lapanakni. ¹³ Ixluwchak'ani tak'uch'ulh yu wa ixtala'apaxt'o'a makxkay'un, chi ixluchak'ani yu ixta'ukmuk'aycha aceite yu wa ixtata'an'ay, chi ixtatak'uch'uycha.

An jama'paxanaj Juan nilh

¹⁴ An rej Herodes k'atsalhi li an Jesús sawalhcha ixmispakan. Ixtalaknajun yucha an ixjama'paxanancha Juani la'awcho'olh xliyu lay lhilak'ilhtuy masi yu la'lhima'anxkay laj'ay tanlhun, yu masuy ix'alhp'asninti an Dios. ¹⁵ An ali'in ixtanajun:

—Yucha an Elías.

Chi an ali'in ixtanajun:

—Ka xamaticha yu wachu chun tacha an yu ixtalhichiwini ixchiwinti Dios ma'anchacha.

¹⁶ Akxni asmatlhi an Herodes, najun:

—Yucha an Juancha la'awcho'olh an yu ikhlinawlh li ka'a'cha'xkahl.

¹⁷ Mu yucha an Herodesi ixmalaklhchajuta an Juan, xliyu chuncha lhinajun, ixch'i'ulatacha laka kadena, wa xliyu li an Herodes ixt'at'awniya an ixjamacha'a wa ixt'ala'ajuncha junkan Felipe, an ixjamacha'a Felipe ixjunksan Herodías. ¹⁸ Chi mu an Juan ixjuniya an Herodes:

—Jantu oxi li t'ats'uk'uniy an ixjamacha'a mint'ala'ajun Felipe.

¹⁹ Pus xliyu an t'aku Herodías sawalhcha ixma'niputuni an Juan, pero ntu lay ixma'ni. ²⁰ Mu an Herodes ixtalhamniya an Juan, mu ixk'atsayi li yucha oxi ixt'ajun, yucha ntu ix'ilhtuyi ixtala'alhin, pus an Herodes oxi ixlist'ak'a an Juan. Sawalhcha ix'alha'asmatputuni an Herodes an Juan, pero ntu oxi ixlimacha'xay. ²¹ Milh la'atam wilhchan akxni la'tsalh ixk'ata an Herodes tacha

ixput'ajun, jat'awaylh an ix'a'tayjunin chi an xalaj'ajin lapanakni la'acha'an Galileaj. ²² Pus an istsi an t'aku Herodías tanuchalh chi jat'ínilhcha. Walh an Herodes oxicha lhiwilalh chi an yu ixjat'alakwajin wachu', pus an Herodes juniy an jatsi:

—Wa t'uch'ich'a k'isk'inip'ut'un, ak'isk'inincha.

²³ Chi jurarlanilhcha juniy:

—Akxta'niyani wat'uch'ich'a ak'isk'iniya'a, sta paytat an kilhich'alhkat.

²⁴ Pus an jatsi taxtulh chi juniy an ixnati:

—¿Tisuncha aksk'inilh?

An ixnati an jatsi juniy an istsi:

—Yucha an ix'a'tsulh jama'paxanaj Juani k'ask'int'i.

²⁵ So'oyo tanucho'ochalh an jatsi, junicha an rej:

—Yucha an ix'a'tsulh jama'paxanaj Juani ak'ixt'a'nin laka la'atam pulatoj.

²⁶ Pus an rej sawalhcha ta'oxila'alhilh, pero mu ixjunitacha li kaxta'niya sawalhi watuchicha kask'iniya an jatsi, chi ixta'alha'asmat'ojotacha ixchuxk'an, pus tucha taa laputulh. ²⁷ Watukancha mak'alhi pumatam isoldado, juniy li kalhiminilhi an ix'a'tsulh jama'paxanaj Juan. Pus chunchacha ilhtulh an soldadoj. Ki'a'cha'xlichan an Juan an laka pulach'in. ²⁸ Chi lhicha'alhcha an a'tsulh laka pulatoj an soldadoj, pus xta'nilhcha an jatsi', chi an jatsi yucha xta'nilhcha an ixnati. ²⁹ Akxni tak'atsaalhcha an ixt'alhtanan an Juan, taki'inilhi an ixlakatunaj, chi tamaknulhcha.

An Jesús la'akisi milh lapanakni jamawalh

³⁰ An ixt'alhtanan Jesús tat'atala'xto'lhicha chi tajunicha tuchini ta'ilhtulhcha chi tuchini tamasulhcha.

³¹ Yucha jajuniy:

—K'at'at'itcha, katala'xtinucha, tan wa jasa'nik'acha k'at'ijast'aknana'it.

Mu lhuwi yu ixtacha'an chi yu ixtatasp'itcho'oyachalhcha, pus tucha layi masi wa katitawaylhcha.

³² Tapu'alhcha la'atam barcoj tan wa jasa'nik'a. ³³ Pero

mu ixluwk'ani yu tala'ts'ilh tan tapu'alh. Pus tamispalhi an Jesús, wachuncha chux an la'acha'anaxni an lapanakni tataxtulh talakats'alaj'alh yu'uncha p'ulh tacha'alh. ³⁴ Akxni tatakutlhicha an laka barcoj, an Jesús jala'ts'incha tan ts'anani ixtayanalh, pus jamapaynicha, mu wa tacha borregojnicha yu ntu xamati jalhist'ak'a. Pus tsukulhcha jamasuni lhuw tanlhun. ³⁵ Sawalhcha ta'oxay, an ixt'alhtanan an Jesús tala'alh, tajuni:

—Sawalhcha ta'oxay, chi ani wa jasa'nik'a, ³⁶ k'aja'uni li kata'alhcha, para li kata'alhcha an lakt'ikt'i la'acha'anaxni, mu ntu tu'u yu katita'ulh aniy, katatamawyacha pan.

³⁷ Yucha ja'alhtaylh, jajuniy:

—K'ajamawatcha uxitnan.

Yu'uncha tajuni:

—¿Tasicha? Ka wanajcha la'lhuwi ajkalhimawaw pan ixchuxk'an.

³⁸ Pus jajuniy:

—¿Tasu a'xchuxcha pani lhit'ant'at'it? Ak'ila'ts'int'it. Akxni tala'cha'ancholh, tajuni:

—A'xkisi pan chi a'xt'uy jatanti.

³⁹ Ixchuxk'an jajuniy li katatala'apitsilhcha kilhmaktamin, chi li katalaktawilhcha an tan st'a'an malh jats'in. ⁴⁰ Pus talaktawilhcha, kilhmaktamin tamincientoj chi kilhmaktamin t'up'uxamkawin. ⁴¹ Yucha xa'a'ilhcha an a'xkisi pan chi an a'xt'uy jatanti chi tala'st'alhcha an lakt'iyani, xta'nilhcha lhimala'puchajun an Dios. La'ch'e'elhcha an pan chi jaxta'nilhcha an ixt'alhtanan para li katamala'pitsilhcha, chi an jatanti wanajcha chun. ⁴² Ixchuxchak'ani oxi talak'ulh tacha talhi'o'atsalhcha. ⁴³ La'akawt'uy kanastaja a'tsamcho'olh yu wa xaxajnicha an pan chi an jatanti, yu ntucha ta'u'olh. ⁴⁴ La'akisi milh lapanakni yu an talakwaylh.

An Jesús ukxjalhtanan an laxxkan

⁴⁵ Ixli'astan an Jesús jajuniy an ixt'alhtanan li kata-pu'alhcha an ixtapiktutam laxxkan an barcoj, tanchun

la'acha'an junkan Betsaida, mu yucha ixtijala'axa'alat'ajun an lapanakni. ⁴⁶ Jala'axa'ala'olh, alhcha tapayninini Dios a'stitawk'a. ⁴⁷ Walh puts'istacha, ixpaytatcha an lakxkani ix'anta an barcoj. Wa ix'akstucha ixt'awnachalh an Jesús lakaat'un. ⁴⁸ Chi mu jala'ts'incha tacha lhita'ay talay tax'elhniy an barcoj an ixt'alhtanan, mu an un wa ixjalakatast'uka, pus ka tacha las trescha tunkunmintacha jala'alhcha. Ukxjalhtanaj'alhcha an xkan, ixjapu'iniputuncha ixja'ilhtuy. ⁴⁹ Akxni tala'ts'ilh li ukxjalhtanani an lakxkan, tanajun li sna wa uncha, ixtalakt'asaycha. ⁵⁰ Mu ixchuxchak'ani ixtala'ts'in ixtalaktalhanancha, pero yucha watukan jaxa'alalh, jajuniy:

—¡Mu kit'in, oximaj'ayi k'a'unt'it, jant'u k'alakt'alhanant'it!

⁵¹ Jala'tajuchalh an laka barcoj an Jesús, sa'cha tawilhi an un, pus sawalhcha ixtalhi'a'niy, ⁵² mu wachuka ntuka' ixtalhimacha'xapalayi an tan ixlalhawata pan, mu ntu ixtakiklaka'iya li layi ka'ilhtulh.

An Jesús jak'uch'ulh an ta'an'anin laxalakaat'un Genesaret

⁵³ Tapatakutlhicha an lakxkan tacha'alhcha tapiktutam, la xalakaat'uncha Genesareti tacha'alh. ⁵⁴ An Jesús watukan tamispalhi akxni tatakutlhicha an laka barcoj. ⁵⁵ Pus watukan tata'a'pitsi'olhi an lapanakni, ta'alhcha lak'inini an ta'an'anin, chi talakch'ix-lich'a'a'nilhcha la ixputamatk'an an ta'an'anin an Jesús, tan an ixtak'atsay li ancha ixt'ajun. ⁵⁶ Watanchuncha ixcha'an an Jesús, laj'ay la'acha'anaxni, chi lakt'ikt'i la'acha'anaxni, u masi tan wa jalhi'ay, an laka laktij ixtamamaycha an yu wa ixtata'an'ay chi ixtatapayninicha li ma kajamakawnilhi masi wa katapikch'apanichalhcha an ixla'ch'it. Ixchuxk'an an yu ixtach'apaniyachalh an ixla'ch'it, ixtatak'uch'uycha.

Yu lay ma'ta'an'ajlay an lapanak

7 ¹ An fariseojnin chi ali'in xamaestrojnin lhama-p'a'sin, yu ixtamintachalh la'acha'an Jerusalén, tala'cha'alhcha an Jesús. ² Walh tala'tsilhi li an ali'in ixt'alhtanan an Jesús jantu ixtama'ch'a'ayi ixtalakwajin, pus tanajuni li ntu oxi chuncha. ³ Mu yu'uncha chi an judiojnin jantu ixtawajini li ntu ixtala'ma'ch'a'ay, tacha ixtanajun an yu laktatanincha. ⁴ Li ixtakitasp'it'acha tiankis, yu'uncha ixtala'ma'ch'a'apalaycha akxni tu'u kata'uya'. Atumpaj yu wachu sawalhcha ixtalhismanita ixta'ilhtuy, li ixtala'ch'a'ay an vasoj, chi jarro, chi yu de tsasnatcha pala'oxin chi putamat. ⁵ Pus talhisakmicha an Jesús an fariseojnin chi an xamaestrojnin lhamap'a'sin, tajuni:

—¿Tasu li amint'alhtanan jantu ta'ilhtuyi tacha an tanajun an yu laktatanincha? Tawajini masi ntu tala'ma'ch'a'ayi.

⁶ Yucha jajuniy:

—¡Uxitnan wa t'a'ukxp'ut'uyununat'it! Ts'ajwi talhichiwinin an Isaias, an tan ts'o'muk'akantalh la ixchiwinti Dios, tan najunta:

Ani lapanakni oxi kintalhichiwini,
pero la ixjalhunutk'an tu ixlisawalh.

⁷ Wa la'a'ijcha oxi kintalhipast'ak'a,
mu yu'uncha tamasuyi yu wa

ixjatapast'ak'atchak'an lapanakni.

⁸ Tamakajuni an ixlamap'a'sin Dios, wa yucha an ixjatapast'ak'atchak'an lapanakni p'as tach'a'o'ay: an ixla'ch'a'aka vaso, chi jarro, chi tanlhuncha ali yu wanajcha chun.

⁹ Jajumpalay:

—Yucha an mijatapast'ak'atchak'ani lhak'ap'up'inat'it, an ixlamap'a'sin Dios t'uch'a t'u'u lhiwilayat. ¹⁰ An Moisés nawlh: “K'amap'aynit'i minpay chi minati”, chi “Yu wa aya kajuna ixpay chi ixnati jantu kamak'akxanikalh, kanilh”. ¹¹ Pero uxitnan jamak'awniyat'iti an lapanakni

li ntu kata'a'tayjulhi ixlakpaynink'an, wa nawnatcha li yu kaxtalhilhi'a'tayjulh la ixmaknicha Diosi t'aw'ojoy.

¹² Jant'uch'a jamak'awniyat'iti li kata'a'tayjulh ixlakpaynink'an. ¹³ An ixchiwinti Dios lhimap'axayatcha an wa mijatapast'ak'atchak'an, lhuwi yu ch'unch'a ilht'uyat'it.

¹⁴ Jaxa'alalhi tacha an ts'anaks ixlakyakalh, jajuniy:

—Akila'asmatniw chi k'alhimach'a'xat'it minchuxk'an.

¹⁵ Watuchicha yu uy an lapanak jantu yu pulhitsukuy ixtala'alhin, yucha an tacha kilhtaxtuy ixchiwinti yu lay mama'lhta'alhiniy. ¹⁶ Li xamati lhit'ajun ixpa'asmatna, ka'asmatlhi.

¹⁷ Tala'xtinulhcha an tan ts'anaks ixlakyakalh tanulhcha lakacha'a', pus an ixt'alhtanan talhisakmicha tuchini nawputuncha. ¹⁸ Yucha jajuniy:

—¿Wach'u nt'u lhimach'a'xayat'it? ¿Jant'u

k'ats'ayat'iti li chux an yu uy an lapanak jantu layi katimama'lhta'alhinilhcha? ¹⁹ Mu ntu li sna la ixjalhunuti tanuy, la ixpalakni tanuy, chi ixli'astan maj'ancho'oycha.

Yucha nawputulh an Jesús li chux an yu ukan si laj'oxi. ²⁰ Wachu jajumpalay:

—Yucha an ixchiwinti an lapanakcha yu mama'lhta'alhiniy. ²¹ Mu la ixpulakni an ixjalhunutk'an lapanakni taxtuy an lakmakxkay jatapast'ak'at: yu xa'alay xamati, yu jama'ninin, ²² yu ja'alhawanen, yu wa tanischa kalhirikojtawilh, yu jalhitama'chapunun, yu ja'o'xcho'onun, yu ayajk'atsay, yu xkayaj najun, yu lhita'ayay tu'u, chi yu ntu ja'asmatnan. ²³ Chux ani yu ntu laj'oxi tanlhun ixpulakni an jalhunuti minachalh, yucha yu mama'lhta'alhini an lapanak.

Ixjakiklaka'inti t'aku jamacha'a Sirofeniciaj

²⁴ An Jesús taxtuchalhcha Galileaj alhcha la'acha'anaxni xalakaat'un Tiro chi xalakaat'un Sidón; tanuchalhcha lakatam lakacha'a'. Jantu ixlakask'in li xamati kala'ts'ilh, pero ntu lay tats'e'lhi. ²⁵ Mu tichi t'aku ixlit'ajun istsi, wa ixlakpach'apata makxkay'un. K'atsalhi li ancha t'ajun an Jesús, pus la'cha'alh chi tatso'ottatawlhnilhcha la

ixjach'aja'. ²⁶ Tapayninicha li kak'uch'unilhi an istsi'. An t'aku lhigriegojo ixchiwiniy chi jamacha'a Sirofenicia.

²⁷ An Jesús juniy:

—Kachajcha p'ulhnaj tita'o'atsalh an jas'at'an, mu ntu oxi xajachalh li ajkama'osunilhcha yu ta'ut'ajun chi ajkamaka'anilhcha an x'oyun.

²⁸ Pus an t'aku juniy:

—Chuni, Jamach'alhkat, pero an x'oyun ta'usak'a masi wa ixtach'e'echak'an an jas'at'an an ixtan'api mesaj.

²⁹ Pus akxni juniy an Jesús an t'aku:

—T'ach'a an na'un chunchacha sawalh, chaway k'ap'inchicha, an makxkay'un makawlhcha amintsi'.

³⁰ Akxni cha'anch'o'lhcha la ixcha'a an t'aku, an makxkay'un tucha tu'u ixlakpach'apata an istsi', chi sa'cha ixmalhi an la ixputamat.

An Jesús k'uch'ulh lapanak yu wa a'atapa ixjunita chi ntu lay ixchiwiniy

³¹ Taxtucho'ochalhcha xalakaat'un Tiro an Jesús, la'puslicha xalakaat'un Sidón, chi pula'pus'alhcha xalakaat'un Decápolis, chi cha'alhcha la xalaxkan Galileaj. ³² Talhicha'anilh pumatam lapanak yu ntu lay ixja'asmatnan chi ntu lay oxi ixchiwiniy. Tatapayninicha an Jesús li kak'uch'ulh. ³³ Mu lhilhuw, pus mala'xtinulh, tan wa ix'akstucha lhi'alh, lak'akatutamaknulhcha chi lhilakapuch'apanilhcha ixchuj'uti an isima'at. ³⁴ Chi tala'st'alhcha an Jesús an lakt'iyán, jama'aninilh, najun:

—¡Efata! —nawputun: ¡K'alakt'a'a'at'umix'at'icha!

³⁵ Walh watukan la'ta'a'atumix'alh chi ta'oxinilhcha an isima'at, oxicha chiwinilh.

³⁶ —Tu xamati k'a'unit'it —jajuniy an Jesús.

Pero masi li chuncha ixjajuni palay ixtalaknajun.

³⁷ Chi sawalhcha ixtalhi'a'niy, ixtalaknajun:

—Sawalh oxi tacha an ilhtulh, layi jak'uch'uy masi an yu wa laj'a'atapan chi an yu ntu lay tachiwini.

Jamawakalh la'at'at'i milh lapanakni

8 ¹ La'atam wilhchan wanajcha lhilhuwi ixjumpalhkanta, walh tutu'u yu kati'ukalh, pus an Jesús jajuniy an ixt'alhtanan:

²—Ijkamapayniya ani lapanakni, mu la'at'utucha wilhchani kintala'chinta chi ntu tu'u yu katita'ulh, ³ li wachunchacha ajkamala'achacho'oya ixcha'ak'an katala'awitijtayaya lakatij, mu ali'in ma'ati tamintachalh.

⁴ An ixt'alhtanan an Jesús tajuni:

—¿Pero tanischa lay xamati ka'inilh pan ani li ntu xamati wilhi?

⁵ Pus an Jesús jajuniy:

—¿Tasu a'xchuxcha pani lhit'ant'at'it?

Yu'uncha tajuni:

—A'xtujun.

⁶ Pus wachuncha an Jesús jajuniy tacha an ts'anaks ixta'ayxto'nun li katalaktawilhka an lakaat'un, chi yucha xa'a'ilhcha an a'xtujun pan, chi xta'nilhcha lhimala'puchajuni an Dios chi la'ch'e'elhcha, xli'astan jaxta'nilhcha an ixt'alhtanan, chi yu'uncha tamala'pi-tsilhcha. ⁷ Wachu ixtalhi'anta lakats'uniy lakt'ikt'i jatanti, an Jesús wachu lhixta'palh lhimala'puchajun chi jamamala'pitsinilhcha wachu an ixt'alhtanan.

⁸ Oxicha talakwaylh. Ixli'astan la'atujun kanastaja tapusakcho'olh yu wa lakt'ikt'icha xaxajni. ⁹ An yu talakwaylh lapanakni ka tacha la'at'at'i milh. Xli'astan an Jesús jala'axa'alalhcha an lapanakni chi talak'ancho'olhcha. ¹⁰ Chi an Jesús jat'atajulhcha laka barcoj an ixt'alhtanan, ta'alhcha xalakaat'un Dalmanuta.

An fariseojnin task'in li kajamasunikalh tu'u yu lhi'a'nin yu kaminchalh lakt'iyán

¹¹ Tala'cha'alh an fariseojnin an Jesús, tsukulhcha tat'alakixtukuy, tajuni ma kajamasunilh tu'u an lakt'iyán para li ma katakiklaka'ilh. ¹² Pus an Jesús jama'aninilh la ixta'oxila'alhit, najun:

—¿Tasu li talakask'incha kajamasunikalh tu'u ani lapanakni? Chaway sawalh klajunaw jantu tu'u katijamasunikalh ani yu chaway tat'ajun.

¹³ Pus tajupalhi an laka barcoj an Jesús, jamakawyawlhcha. An ixtapiktutamcha lakxkani alh.

Ixlamaskajank'an fariseojnin

¹⁴ Walh takaplhi li katalhi'alh pan, wa a'xtam pani ixtalhi'anta an laka barcoj. ¹⁵ Chi jajuniy an ixt'alhtanan an Jesús:

—K'ajalajk'ats'anant'iti li ntu katamatsaman an ixlamaskajank'an an fariseojnin chi an ixlamaskajan Herodes.

¹⁶ Pus yu'uncha ixtalalhisakmipaxaycha li sna xliyu li ntu tu'u ixtalhi'anta pan. ¹⁷ Chi mu jalhimacha'xanicha an Jesús, pus jajuniy:

—¿Xliyu li nt'u lhit'ant'at pani lhilakch'iwininat'it? ¿Ch'unt'u lhimach'a'xayat'it, sawalhka lakt'ak'alha mijalhunutk'an? ¹⁸ Masi li lhit'awnat'iti mila'chulhk'an, ¿jant'u jalak'awanat'it? Chi masi li lhit'awnat'iti mi'a'ax'olhk'an, ¿jant'u ja'asmatnanat'it? ¿Jant'u p'ast'ak'at'iti ¹⁹ akxni an kla'puch'e'elh a'xkisi pan, chi ijkamawalh la'akisi milh lapanakni? ¿Tasu la'achuxcha kanastaja a'tsamcho'olh an xaxajni yu p'usakch'o'ot'iti?

—La'akawt'uy kanastaj —tajuni.

²⁰ —Akxni ijkamawalh a'xtujun pan la'at'at'i milh lapanakni, ¿tasu la'achuxcha kanastaja a'tsamcho'olh an xaxajni yu p'usakch'o'ot'iti?

—La'atujun kanastaj —tajuni.

²¹ Pus an Jesús jajuniy:

—¿Chi tasucha li nt'uch'a lay lhimach'a'xayat'iti?

Pumatam la'lhtuluw k'uch'ukalh an la'acha'an Betsaida

²² Tacha'alhcha la'acha'an Betsaida an Jesús, walh talhicha'anilh pumatam la'lhtulu lapanak. Tatapayninicha li kalakpach'apalh. ²³ Pus an Jesús ma'ch'apachalhi an

yu wa la'lhtulu, mala'xtinulhcha an la'acha'an. La'pu-chujwalhcha chi lakpuch'apalhcha, xli'astan lhisakmicha li laycha tu'u la'ts'in. ²⁴ Yucha jalakawanalh, najun:

—Wa tacha wa k'iwí ijkala'ts'in an lapanakni, pero talakjalhtanan.

²⁵ Pus a'tam lakpuch'apapalhi an Jesús, oxicha malakawanilh, tala'pu'oxilhcha, ma'atcha ixlakacha'an chi oxicha ixjala'ts'in'ojoy. ²⁶ Walh mala'achalhcha ixcha'a juniy:

—Jant'u k'ap'it'i an la'acha'an ch'i nt'u xamat'i k'a'un.

An Pedroj junilhi tichini yuchacha an Jesús

²⁷ An Jesús chi an ixt'alhtanan ta'alhcha an lakt'ikt'i la'acha'anaxni lhila'acha'an Cesarea de Filipino. Walh lakatijcha jalhisakmicha an ixt'alhtanan an Jesús, jajuniy:

—¿An lapanakni tisi kit'incha tanajuni?

²⁸ Yu'uncha ta'alhtaylh, tajuni:

—Ali'in tanajun ma jama'paxanaj Juank'at'i, ali'in ma Eliask'at'i, chi ali'in tanajun ma xamaticha yu wachu lhichiwiniy ixchiwinti Dios.

²⁹ Wa chuncha yucha jajuniy:

—¿Chi uxitnan, tisi kit'inch'a nawnat'iti?

An Pedroj alhtaylh, juniy:

—Uxint'i Cristojk'at'i.

³⁰ Pus an Jesús jajuniy:

—Jant'u xamat'i k'a'unit'it.

An Jesús jamak'atsaninin li kaniya'

³¹ Tsukulhcha jajuniya li an isTs'alh Dios kastak ma'alh'ajnana'. Li ntu katitala'ts'imputulhi an laktatanincha, chi an xalaj'ajin sacerdotejnin chi an xamaestrojnin lhamap'a'sin. Jajunilhi li katama'niya', pero li ixlila'at'utu wilhchan kala'awcho'oya'. ³² Ts'ajwi ixjajuni. Walh an Pedroj ayli'alh tan wa ix'akstu an Jesús, chi tsukulhcha juniya li ntu chuni kanawlh. ³³ Pero

an Jesús tala'asp'itlhi chi sa'cha jala'ts'ini an ali'in ixt'alhtanan, pus la'a'aymalhcha an Pedroj, junkan an Pedroj:

—¿K'a'ost'i la ki'ukxlakapu'u Satanás!, mu uxint'i nt'u lhak'ap'up'ini yu ix'anu Dios wa yucha an ixjatapast'ak'atk'an lapanakni lhak'ap'up'in.

³⁴ Wachuncha an Jesús, jaxa'alalhi an lapanakni chi an ixt'alhtanan, chi jajuniy:

—Li xamati kinch'a'o'aputun, kakaplhicha yu wa ixjatapast'ak'atcha, akinch'a'o'alhcha masi o'palaj kalhima'ats'an'alh an ixjatsukunti. ³⁵ Mu yu kama'alhtaxtuputuna ixjatsukunti, kama'ats'an'aya', pero yu kama'ats'an'aya ixjatsukunti kilakata chi ixlakata an ixchiwinti Dios, kama'alhtaxtuya'. ³⁶ Jantu tani lhila'an masi wanajcha amaj ix'anu kajun'olh an lapanak an lakamunulhpa', li kama'ats'an'alh an ixjatsukunti. ³⁷ ¿Tisiyuchacha lay tu'u kaxt'a'a ixli'o'lhtapaxan ixjatsukunti? ³⁸ Ani lapanakni yu chaway tat'ajun ta'ilhtuyi ixtala'alhink'an chi ntu ta'ilhtuyi yu sawalh. Yu kint'amaxanani kit'in chi an kinchiwinti, kit'in isTs'alh Dios wachu akt'amaxanana akxni akmina la ix'alhp'asninti an kimPay ali an santoj ix'angelhnin.

9 ¹ Jajumpalay:

—Ani sawalhi ani yu klajunaw, ali'in yu an ani tat'ajun jantu katitanilh, sta akxni katala'ts'inacha kamina alhp'as an ixlich'alhkat Dios.

An ixtapaxat Jesús

² Ixlila'achaxancha wilhchan la'pusli, an Jesús jalhi'alhcha an Pedroj chi an Jacoboj chi an Juan wa ix'akstuk'an tanchun talhman a'stitawk'a. Chi la ixjalakawantichak'an tapaxalhcha an Jesús. ³ An ixla'ch'it xlimjcha walh, wa lhi'o'slaycha sut'ut'u walh, tacha yu ntu lay tu'u chuncha kamasut'ut'ulh xamati masi wa stakcha kama'pajlhi an la'ch'it. ⁴ Chi tatalakasulhcha an Elías ali an Moisés, ixtat'achiwinicha an Jesús. ⁵ Pus an Pedroj juniy an Jesús:



—Maestroj, oxi li ani ikt'awnaw, akla'oxiyaw a'at'utu de jach'itin cha'a', a'atam mi'anucha, a'atam ix'anucha an Moisés chi a'atam ix'anucha an Elías.

⁶ Jantucha ixk'atsay tani kanawlhcha an Pedroj, mu ixtalaktalhanancha. ⁷ Wa akxni ta'alhtajulh la'atam jataputs'i jala'atanchanulhcha, chi chiwinkalhcha an laka jataputs'i nawkan:

—Yucha aniya yu ikmapayni kints'alh, yuch'a k'a'asmatnit'it.

⁸ Xli'astan akxni tajalaklakawananch'o'lh tucha xamati ali tala'ts'ilh, wa yucha an Jesuscha. ⁹ Tata'alh-tajucho'olhcha an a'stitawk'a, an Jesús jajuniy li ntu xamati katajunilh tacha an tala'ts'ilh, jajuniy li katalaknawnaka sta akxni kala'awcho'oya an Jesús an yu walh watacha isTs'alh lapanak. ¹⁰ Pus wa sa'cha tak'atsaalh. Wa yu'unchacha ixtalalhisakmipaxay tuchini jumputuncha li kala'awcho'oya an laka lhinin.

¹¹ Tsukulhcha talhisakmiya an Jesús, tajuni:

—¿Tasu li tanajun an xamaestrojnin lhamap'a'sin li task'iniya li p'ulhnaja kamilh an Eliasi?

¹² An Jesús yucha jajuniy:

—An Elías p'ulhnaja kamina sawalh, kamina lats'awalana chux an tanlhun. ¿Chi k'ats'ayat'iti tacha kilhits'o'muk'akanta kit'in yu ikwalh wa tacha isTs'alh lapanak, li akstak mina ma'alh'ajna chi ntu tu'u akinti-talhiwilalh? ¹³ Pero kit'in klajunaw an Elías kilachilhcha, chi wa tani ta'ilhtuputulhcha ta'ilhtulhcha, tacha an lhits'o'muk'akanta la ixchiwinti Dios li kaputapasaya'.

**An Jesús k'uch'ulh pumatam ts'alh
yu ixlakpach'apata makxkay'un**

¹⁴ Akxni jala'cha'ancho'olhcha an ali'in ixt'alhtanan an Jesús, jala'ts'incha tacha ts'anan ixja'a'yakalh, chi ixjat'alakixtukut'awkancha yu'uncha an xamaestrojnin lhamap'a'sin. ¹⁵ Chi an lapanakni talhi'a'nicha li cha'alhcha an Jesús, pus tala'ats'alaj'alhcha chi ixtala'axa'alaycha. ¹⁶ Yucha jalhisakmilh jajuniy:

—¿Tisunch'a lalhik'ikxt'uk'uyat'iti?

¹⁷ Pus pumatam najun an tan ts'anan ixlakyakalh:

—Maestroj, wa ikhiminitan an kints'alh wa lakpach'apata makxkay'un, tucha makawniya kachiwinilh. ¹⁸ Wa tanchuncha putawlachilh ma'taycha, xut'ut'ucha ma'pupuy chi wa xwat'at'acha tasat'ajun, wa k'alijicha junt'ajun, chi ijkajunicha a mint'alhtanan li katak'u-ch'ulhka', pero ntu lay tak'uch'uy.

¹⁹ Pus an Jesús jajuniy an ixt'alhtanan:

—¡Yu chaway ani t'awnat jant'u jak'iklak'a'ininat'it!
¿Tasu wanancha wa aktilat'a'aklatsukuyaw chi wa aktilalhilhitayaninyawi? Akilalhiminiw. ²⁰ Pus talhi'a-nilhcha an ts'alh an Jesús. Walh akxni an makxkay'un la'ts'ilhcha an Jesús, ma'tapalhcha an ts'alh, p'ascha ixlakchikixa chi ixma'atamp'ilicha, chi ixma'pupuycha. ²¹ An Jesús lhisakmicha an ixpay an ts'alh tani ixli-ma'anacha chuncha lay, yucha najun:

—Wa ixtajas'at'at, ²² a'lhucha ma'niputun ma'tay laka jikmi chi lakxkan. Li sna layi k'ak'uchut'i lamapaynin akilalhi'a'tayjuka'.

²³ An Jesús juniy:

—¿Sna layi ajk'uch'ulh? Watuchicha layi li k'iklak'a'i.

²⁴ Pus watukan najuni an ixpay an ts'alh:

—Chun, ijkiklaka'i, pero ak'ila'alhp'asninini an kijakiklaka'inti.

²⁵ Chi mu la'ts'incha an Jesús li wanajcha lhilhuwi ixcha'ant'awkan, pus akxni la'a'aymalhcha an makxkay'un, juniy:

—Makxkay'un yu nt'u ch'iwininy chi a'atapak'at'i, k'amak'awcha ani ts'alh, chi nt'uch'a ali k'alakp'ach'ap'a.

²⁶ An makxkay'un ch'ik'ik'icha t'asalh, chi p'ascha lakchikixli an ts'alh, makawlhcha, wa tacha wa nitacha sa' tamalh, ixtalalnajun ma nilhcha. ²⁷ Walh an Jesús ma'ch'apasaklhi an ts'alh, oxicha tayacho'olh. ²⁸ Tanulhcha laka cha'a an Jesús, chi tan wa ix'akstuchak'an an ixt'alhtanan tajuni:

—¿Tasu li kitnan tulay ijk'uch'uwi?

²⁹ Pus yucha jajuniy:

—Wa xliyu li ani makxkay'un jantu taxtuyi li ntu tapayninikani an Dios chi li ntu lhitaskajakani jantucha waykan.

A'tamcha nawpalayi an Jesús li kaniya'

³⁰ Wa ancha ta'alhcha, xalakaat'uncha Galilea ja tapu'alh, chi ntu ixlakask'ini an Jesús li xamati kak'a-tsaalh. ³¹ Mu ixjamasuniy an ixt'alhtanan ixjajuni:

—Kit'in yu ikjunlhi isTs'alh lapanak akima'axta'kana la ixmaknik'an an lapanakni, chi akintama'niya', walh ixlila'at'ut'u wilhchan akla'awcho'oya'.

³² Pero yu'uncha ntu talhimacha'xanilh chi ixtatalhanani li katalhisakmilh.

¿Tisi yuchacha xa'ayi?

³³ Tacha'alhcha la'acha'an Capernaúm, chi laka cha'acha an Jesús, jalhisakmicha an ixt'alhtanan tuchini ixtalhilakchiwij'antacha an laka tij. ³⁴ Yu'uncha sa' talajkilhulh, mu yu'uncha ixtalhilakchiwij'anta tichini palaycha lhitapalayi yu yu'uncha. ³⁵ Wachuncha

tawilhcha an Jesús, chi jaxa'alalhcha an ixpumakaw-t'uyk'an ixt'alhtanan, jajuniy:

—Li xamatiy palay lhitapalay jumpupun, yucha xalakat'ikt'i kawalh chi kajatapatsani'olhcha an ali'in.

³⁶ Chi ma'ch'apachalh pumatam jas'at'a an Jesús, ixtan'ajnichak'ani yawlh, chi ch'ix'ilhcha, jajuniy:

³⁷ —Li xamatiy la'a'i xamati jas'at'a tacha aniy la kintalakask'i, kit'ini kila'a'i, chi li kila'a'i, yucha an yu kimakminta la'a'i.

Yu ntu kintat'alaxtukuyan kintat'a'anan

³⁸ An Juan alhtaylh, juniy:

—Maestroj, ikla'ts'iw pumatam lapanak yu jak'uch'uyi la minta'a'ut an yu wa lakpach'apata makxkay'un, walh chi ntu kintat'alhtananan, pus tucha ikmakawniw, mu ntu kintach'a'o'an.

³⁹ An Jesús juniy:

—Jantu, jant'u ch'uni k'a'unit'it, mu ntu xamati yu lay ilhtuy laj'ay tu'u la kinta'a'ut, chi xli'astan wa tani akilhipastakpalhcha. ⁴⁰ Yu ntu kintat'alaxtukuyan, kintat'a'anan. ⁴¹ Chi wa tichicha yu taxta'niyan masi wa tamcha vasoj xkan la kilakata, kaxta'nikana ixregalo, mu uxitnan kint'alhtanan.

Yu jama'o'xcho'onun

⁴² 'Pero li xamati jama'o'xcho'oy an yu kintakiklaka'icha, palay oxi kalhtuj ch'ipixtanukalh aya xwati, chi kawarjcha maka'ankalh tan talhman lakxkan.

⁴³ Chi li amimaka ma'ilhtuyani yu ntu oxi, k'at'iklh ch'a'xmaj'a, mu palay oxi wa maklht'ulukuk'a'unt'i li k'ach'ip'i laka jatsukunti, walh jantu li a'tsa'ojoy mimaka chi k'ap'it'i laka lhinin tan tu a'tam mixta jikmi, ⁴⁴ tan an ixlakatsapulhk'an tu a'tam taniniy, chi an jikmi wachu ntu a'tam mixa. ⁴⁵ Chi li aminch'aja p'u'ayst'uk'uk'an, k'at'iklh ch'a'xmaj'a, palay oxi wa ch'anlht'ulukuk'a'ach'ip'i laka jatsukunti, walh jantu li ch'an'a'ts'a'o'oy k'amak-p'ink'a laka lhinin, tan tu a'tam mixa jikmi, ⁴⁶ tan an

ixlakatsapulhk'an tu a'tam taniniy chi an jikmi wachu ntu a'tam mixa. ⁴⁷ Chi li a mila'chulh ma'ilhtuyani yu ntu oxi, k'at'ap'axt'u, palay oxi k'ach'ip'i tan ch'alhkatnan Dios wa mintalaktam, walh jantu li masi a'tsa'ojoy mila'chulh k'amakp'ink'a laka lhinin, ⁴⁸ tan an ixlakatsapulhk'an tu a'tam taniniy chi an jikmi wachu ntu a'tam mixa. ⁴⁹ Chux lapanakni laka jikmi kajala's'o'okana', chi chux lha'ulan laka matsati kala'oxikana'. ⁵⁰ An matsat oxi, pero li kama'ats'an'alh an is'o'onti, ¿t'asich'a k'alhis'o'och'o'oya'it'iti? Jant'u k'ama'ats'an'at'iti ami matsatk'an, para li oxi k'alalhip'it'it.

An Jesús jalhixa'alay an lamakawt

10 ¹ Taxtulh an Jesús la'acha'an Capernaúm, alhcha xalakaat'un Judea chi an ixlitapiktutamcha ayxkan junkan Jordán, walh wanajcha lhilhuwi la'cha'ampalhhalkh, pus tsukulhcha jamasunipalay tacha ixlismanitacha.

² Tala'cha'alh ali'in fariseojnin talhila'ts'intanuycha an Jesús, tajuni li sna oxi li xamati lapanak kat'alamakawlh ixjamacha'a'. ³ Yucha ja'alhtaylh jajuniy:

—¿Tasicha tajunin an Moisés?

⁴ Yu'uncha tajuni:

—An Moisés, makawnilhi an lapanak li layi kaxta'niya ixjamacha'a' a'xtam jalhiki yu katalapumakawna', chi kamakawnacha.

⁵ Pus an Jesús jajuniy:

—Chunchacha lhinawlh an Moisés mu wa xliyu nt'u k'is ja'asmatnanat'it, ⁶ pero an Dios akxni ilhtulh an lapanak, pumatamcha lapanak chi pumatamcha t'aku ilhtulh. ⁷ Xliyu an lapanak, kamakawna ixpay chi ixnati, ixjamacha'acha kat'atala'xt'o'a'. ⁸ An ixt'uyunk'an tachanu wa pumatamcha katajuna', jantucha ixt'uyunk'an, tachanu wa pumatamcha. ⁹ Yu Dioscha jamala'xto'lhi jantucha kajalamamakawnilhi an lapanak.

¹⁰ Laka cha'acha, a'tam talhisakmipalhi an ixt'alhtanan an Jesús yu yucha ixlakata. ¹¹ Pus jajuniy:

—Wa tichicha yu makajun ixjamacha'a chi t'atsukupalaycha pumatam t'aku, wa aya laycha. ¹² Chi tam t'aku yu makajuni ixt'apapa chi t'atsukupalaycha pumatam lapanak, wachucha wa aya lay.

**An Jesús tapaynini an Dios li oxi
katatsukulh an jas'at'an**

¹³ Ixtalhicha'anicha an jas'at'an an Jesús para li kaja-laklakpach'apalh, pero an ixt'alhtanan talaj'aymalhi an yu ixtalhicha'ani. ¹⁴ Walh akxni jala'tsilh an Jesús lhitalh'amalh chi jajuniy:

—Kachajcha tamilhi an jas'at'an, jant'u k'ajalaj'aymast'ukt'it, mu an ixlich'alhkat Dios ixnawink'an yu tacha yu'uncha. ¹⁵ Kit'in sawalhi an yu klajunaw li yu ntu la'a'iya an ixlich'alhkat Dios tacha pumatam jas'at'a, jantu katich'a'alhi tan ch'alhkatnan Dios.

¹⁶ Chi jalakch'ix'ilhcha an jas'at'an, jalaklakpach'apalhcha, jalhisk'inilhcha an Dios li oxi katatsukulh.

Pumatam ts'alh yu jamatumin

¹⁷ Akxni ixti'ancho'oycha an Jesús, la'ats'alajcha'alh pumatam lapanak, chi tatso'ottanilhcha la ixlakapu', juniy:

—Oxi Maestroj ¿tasicha aklhit'alalh para li aklhitsukulh an yu ntu min'ojoy jatsukunti?

¹⁸ An Jesús juniy:

—¿Tasu li k'i'unicha li oxi klapanaki? Tu xamati yu oxi lapanak, wa pumatami yu chun, Dios. ¹⁹ K'ats'aycha an lhamap'a'sin: “Jant'u wa aya k'alat'i, jant'u k'ajama'nin, jant'u k'aja'alhawan, jant'u k'amaslak'at'in, jant'u k'aja'o'xch'o'on, oxi k'ala'ts'i mimpay chi minati.”

²⁰ Pus an lapanak juniy:

—Maestroj, chuxcha chuncha ik'ilhtu'ojoy wa kintats'alat.

²¹ Pus an Jesús sa'cha ixla'ts'in chi ixmapaynicha, juniy:

—Pero ts'an'aniyanka la'atami yu k'a'ilht'u, k'ast'a'o chux an yu lhit'a'un chi k'ajamala'p'its'inincha an jakilhpatinin, chuncha yu k'alhits'uk'uya'a laj'oxi mintanlhun an lakt'iyan, xli'astan k'at'ana'acha ak'inch'a'o'aya'acha masi o'palaj k'alhima'ats'an'at'i anmijatsukunti.

²² Ancho'olhcha an lapanak, sawalhcha lhita'oxila'alhiya tacha an junkalh, mu lhuw ixtanlhuni ixlit'ajun. ²³ Chi an Jesús jalaklakawanancha, jajuniy an ixt'alhtanan:

—¿Sawalhcha lhima'anxkayi katacha'ana an la ixlich'alhkat Dios an yu talhit'ajun lhuw ixtumink'an!

²⁴ An ixt'alhtanan sawalhcha ixtalhi'a'niya tacha an jajunilh, pus an Jesús jajumpalay:

—Kints'alan, ¿sawalh lhima'anxkayi katatanuyanta la ixlich'alhkat Dios an yu tachanu tumin takiklaka'iy!

²⁵ Palay wa lasi kastaala'pusli la ix'istaj makskat la'atam camello, walh jantu li katanuchalh xamati jamatumin an la ixlich'alhkat Dios.

²⁶ Pus palaycha ixtalhi'a'niy, ixtalajumpaxay:

—¿Pus tisiyuchacha lay kata'alhtaxtuya'a?

²⁷ Pus an Jesús sa'cha jala'ts'in, jajuniy:

—Yu an lapanak tulay ilhtuy, an Dios yucha layi ilhtu'ojoy chux.

²⁸ Xli'astan an Pedroj tsukulhcha juniya an Jesús:

—Kitnan ikhlhimakaw'otawcha kintanlhunk'an, mu klach'a'o'atawcha.

²⁹ Pus an Jesús najun:

—Aklajunaw yu sawalh, masi yu lhimakajuntacha ixcha'a, u ixjat'ala'awnin, u ixjamatsanan, u ixpay, u ixnati, u ixt'atsukunu, u ixjas'at'an, u ixlakaat'un, kilakata chi ixlakata an laj'oxi chiwinti, ³⁰ tam cientoj palayi kaxta'nikana ani lakamunulhpa: ixcha'a, ixjat'ala'awnin, ixjamatsanan, ixnatin, ixjas'at'an chi ixlakaat'un, masi aniy lalhilhitama'chapukan. Atumpaja kaxta'nikana jatsukunti yu ntu a'tam min'ojoy, akxni kamina an yu tumpajcha lakamunulhpa'. ³¹ Ixluwk'ani an

yu sawalhcha talhitapalay tanajun, xati'astani katajuna',
chi an yu ntu talhitapalay jajunkan, p'ulhnaja katajuna'.

A'tam jajumpalayi an Jesús li katama'niya'

³² Ixtitataka'ast'a'ancha la'acha'an Jerusalén an Jesús ali an ixt'alhtanan, ixp'ulayi an Jesús, an ixt'alhtanan jantucha ixtalhimacha'xayi li an Jesús o'sliyani ixti'an an la'acha'an masi ixk'atsaycha li kaniya', chi an yu astan ixtamintachalh ixtalaktalhanancha, pus an Jesús a'tam jalhi'ampalhi tan wa ixpu'akstuk'an an ixpu-makawt'uyk'an ixt'alhtanan, tsukulhcha jajuniya tani kaputapasayacha, jajuniy:

³³ —Titama'ast'a'anawcha Jerusalén, tan kama'axta'kana an yu junlhi isTs'alh Lapanak. La ixmaknik'an an xalaj'ajin sacerdotejnin, chi an xamaestrojnin lhamap'a'sini kama'axta'kana', chi yu'uncha katanawna li kama'nikalhcha, katat'alama'axta'niyacha an Romanojnin. ³⁴ Jantu tu'u katitalhiwilalh, katala'ana'maya, katala'achuj'waya, chi katama'niya', walh ixlila'at'utu wilhchan kala'awcho'oya'.

An Jacoboj chi an Juan tapiktutawlhputun an Jesús

³⁵ An Jacoboj chi an Juan, ists'alan tichi lapanak junkan Zebedeo, wanicha tala'alh an Jesús, tajuni:
—Maestroj, klask'iniputunaw lamapaynin.

³⁶ Yucha jajuniy:

—¿Tisunch'a lak'ask'inat akla'ilhtuniwi?

³⁷ Pus tajuni:

—Akilamakawniw li aklapiktutawlhcha'awi tapiktutamin t'an k'ap'ina'a ch'alhkatna'.

³⁸ An Jesús jajuniy:

—Jant'u k'ats'ayat t'uch'ini sk'inatcha. ¿Layi k'alhit'ayaniya'it an ma'alh'ajnat yu akma'alh'ajnana', chi k'aniya'it'iti tacha akniya'?

³⁹ Yu'uncha tajuni:

—¡Chun kalaya'!

Pus an Jesús jajuniy:

—K'ama'alh'ajnana'itcha tacha kit'in, chi k'aniya'itcha tacha kit'in. ⁴⁰ pero li lay akilapiktutawlaw tapiktutamin, kit'in tulay aktilaxta'niw, mu ancha katatawla yu anchacha jalhisakxtukanta.

⁴¹ Akxni ta'asmatlhi an ixpumakawk'an ali'in ixt'alhtanan an Jesús, tat'alatalh'amajla'tsilhcha an Jacoboj chi an Juan. ⁴² Pus an Jesús, jaxa'alalh jajuniy:

—Uxitnan k'ats'ayat'iti li an yu tajun xajamach'alhkatni an laj'ay la'acha'anaxni wa talhinajuncha, chi an yu palay xalaj'ajin, yu'uncha yu palaycha wa talhinajun. ⁴³ Pero aniy uxitnan, tam. Aniy yu lhitapalay jumputun p'ulhnajcha kajatapatsanilhi an ali'in, ⁴⁴ chi yu palaycha tukan xa'ay jumputun yu uxitnan, yucha yu palay xalakat'ikt'i kawalh chi kaja'ilhtunilhcha tanlhun ixchuxk'an an ali'in. ⁴⁵ Mu masi kit'in yu ikjunlhi isTs'alh Lapanak, jantu ikminta li wa akilak'ilhtunikalhcha an tapatsat, kit'in iklamintaw tapatsaninin, chi ikminta ma'axta'na an kijatsukunti para li lhuw lapanakni katata'alhtaxtulh.

Pumatam la'lhtulu lapanak junkan Bartimeo malakawanikalh

⁴⁶ Wachuncha la'acha'an Jericojcha tacha'alh. Chi akxni ixtitataxtucho'oycha an Jesús ali an ixt'alhtanan ts'ananacha ixjach'a'o'akanta, walh pumatam la'lhtulu lapanak junkan Bartimeo, ists'alh tichi lapanak junkan Timeo, an ixpiktu tiji sa' ixwilh, isk'in la'a'tayjun.

⁴⁷ Pus akxni asmat'acha li yucha an Jesús yu jamacha'a Nazareti ix'antachalh, tsukulhcha t'asay najun:

—¡Jesús, ists'alh David, iksk'iniyan ay lamapaynin!

⁴⁸ Pero an ali'in lapanakni tala'a'aymalh para li sa'cha kakilhulh. Pero yucha palay p'as ixt'asay:

—¡IsTs'alh David iksk'iniyan ay lamapaynin!

⁴⁹ Wachuncha an Jesús sa'cha tayalh, chi jajuni an yu ixtat'a'anta li katat'asanilhcha an la'lhtulu lapanak, pus tat'asanilhcha chi tajuni:

—T'ut'ani k'anaw, k'at'aycha, t'asaniyani an Jesús.

⁵⁰ Pus lht'ele' maj'alhi an ixpupula'axt'a'kan an la'lhtulu lapanak, tayalhcha, la'alhcha an Jesús. ⁵¹ An Jesús juniy:

—¿Tasu ak'ilhtunch'a na'uni?

Pus an la'lhtulu lapanak juniy:

—Maestroj, ijkalakawanamputun.

⁵² An Jesús juniy:

—An mijakiklaka'inti ma'alhtaxtuncha, k'ap'inchicha. Pus wa akxni jalakawanalhcha, chi ch'a'o'alhi'alhcha an Jesús an laka tij.

Tanuchalhcha la'acha'an Jerusalén an Jesús

11 ¹ Akxni ixtacha'ant'ajuncha la'acha'an Jerusalén, wa nicha la'acha'an Betfagé chi wanicha la'acha'an Betania, la ixlakapucha an a'stitawk'a juncan laka'olivojnin, an Jesús jamala'achalhcha ixt'uyunk'an ixt'alhtanan. ² Jajuniy:

—K'ap'inchi'it'it an tan tasuy la'acha'an, chi akxni k'ach'ip'ina'it'it k'ala'ch'ip'ina'it'it la'atam jas'at'a burroj, ch'iyawkanta, jantuka' a'tam putawk'akan, k'ax'ot'iyait, ³ li xamati talhisakmiyan t'uch'ini lhix'ot'iyatcha, k'a'una'it'it li yucha an jamach'alhkati ma'lhtask'ini, li wa tukan kama'axta'cho'oya'.

⁴ Pus ta'alhcha, walh tala'cha'alhcha an burroj, ixch'iyawkanta laka malhticha lhilaka tij, pus tax'ot'ilhcha. ⁵ Walh tichi yu'uncha yu ancha ixta'wilanalh tajuni:

—¿Tasu li ix'ot'iyatcha an burrojo?

⁶ Pus yu'uncha chunchacha tanajun tacha an ixjajunita an Jesús, pus jamakawnikalhcha. ⁷ Talhi'anilhcha an Jesús an burroj chi an lapanakni talak'aymuk'anilhcha an burroj yu ixtaputala'axt'a'ta yu'uncha, chi putawk'alhcha an Jesús. ⁸ An ali'in ixtalakmamaycha an yu ixtaputala'axt'a'a an tan ixpu'anta an Jesús, chi an ali'in ixtala't'e'emanicha jach'itin. ⁹ An yu ixtap'ulanan chi an yu astan ixtamintachalh ixtalakt'asaycha, ixtalaknajun:



—¡Kajama'alht'axt'uncha chaway! ¡Oxi ani lapanak
yu Dios makmintalh! ¹⁰ ¡Oxi an minta llich'alhkat,
ixlich'alhkat kimpayk'an David! ¡Hosanna kanawkalh
an lakt'iyán!

¹¹ Cha'alhcha Jerusalén an Jesús chi tanuchalhcha
an laka xa'ay tajtan, sa'cha ixjalaklakawanan wayu, mu
tats'isicha, ta'alhcha Betania ali an ixpumakawt'uyk'an
ixt'alhtanan.

La'a'aymakalh xak'iw higo

¹² Ixlila'atamcha wilhchan, akxni ixtitaxtuchu'oycha
Betania, chawanalhcha an Jesús. ¹³ Walh laka'an ma'at
lanan, st'a'aj yachalh a'atam xak'iw higo, pus alh
laka'ana li sna uk'alh, walh cha'alh la'ts'in tu tu'u
uk'alh, wasiy xax'oy mu ntu ixpaku'. ¹⁴ Pus an Jesús
juniy an xak'iw higo:

—Jantu a'tam ka'unini xamati mijatawk'at. Walh
ta'alha'asmatlhi an ixt'alhtanan.

Jatamakxtu'okalhi an yu ixtajast'anan laka tajtan

¹⁵ Tacha'ampalhcha Jerusalén, walh an Jesús akxni tanuchalh an laka xa'ay tajtan, tsukulh jatamakxtuyi an yu ixtajast'anan chi an ixtajatomawnan ixpulakni tajtan. Jala'ma'atasp'itni'olhi an mesa an yu ixtamapaxay tumin chi an ixtants'ik'an an yu ixtast'ay palomaj. ¹⁶ Jantucha ixmakawniya li xamati ali kat'atanuchalh tu'u'.

¹⁷ Tsukulhcha jamasuni jajuniy:

—Mu ts'o'kanta an la ixchiwinti Dios tan najun: “Chux an lapanakni ta ixlijalhi'ay an lakamunulhpa' an kincha'a katajuna putapaynin.” Walh uxitnan wa p'a'alhawnanatcha.

¹⁸ Pus ta'alha'asmat'acha an xamaestrojnin lhamap'a'sin chi an xalaj'ajin sacerdotejnin. Pus talhipuxkawnilhcha tani katalhima'nilhcha, mu ixtatalhamnicha chi, mu ta lhichux an la'acha'an ixtalhi'a'ninicha an ixlamap'a'sin.

¹⁹ Pero an Jesús akxni tats'isilhcha taxtulhi an la'acha'an.

An yu la'a'aymakalh xak'iw higo xixli

²⁰ Tala'puspalhcha wats'isin an tan yalh xak'iw higo, xixtacha chux xajataxiyak. ²¹ Wachuncha an Pedroj past'ak'ach'a, juniy:

—Maestroj, jo'o k'ala'ts'i, an xak'iw higo an yu la'a'aymat'i xixtacha.

²² An Jesús alhtaylh juniy:

—K'ak'iklak'a'it'iti an Dios. ²³ Mu wa tichicha yu kajunilh ani a'stitawk'a: “K'a'ost'i, an lakxkancha k'at'a'uchi”, li k'iklaka'iya chux la ixjalhunut chi li lhiwilayi an yu najun li kuna, kuna sawalh. ²⁴ Xliyu klalhijunaw, watuchicha t'ap'aynisk'inat'it, k'ak'iklak'a'it'iti li k'axt'a'nik'ana'it'it sawalh, walh k'axt'a'nik'ana'it'it sawalh. ²⁵ Chi akxni t'ap'ayniyat, k'amala'mixiniti xamati yu ta'ilhtuniyan tu'u tala'alhin, walh wachu katamala'mixiniyani mintala'alhink'an an mimPayk'an yu wilhchalh lakt'iyan. ²⁶ Pero li nt'u

mala'mixiyat'it, wachu ntu katitamala'mixinini an mimPayk'an yu wilhchalh lakt'iyen.

Ixlich'alhkat Jesús

²⁷ Wachuncha ta'ampalhcha Jerusalén, walh akxni ix'aklat'ajuncha laka tajtan an Jesús, tala'cha'alhcha an xalaj'ajin sacerdotejnin chi an xamaestrojnin lhamap'a'sin chi an laktatanincha. ²⁸ Tajuni:

—¿T'asu li ch'unch'ach'a layi, tisiyuchacha makawniyan li k'ajalakt'amakxt'u an tajast'anani?

²⁹ An Jesús ja'alhtaylh jajuniy:

—Aklajunawi tuchini chunchacha iklihi'ilhtuy li wachu akilajunawi yu aklalhisakmiyaw. ³⁰ ¿An ixjama'-paxanti Juan, Diosi ixlijuni u wa ixjatapast'ak'atcha lapanak? Akilajuniw.

³¹ Pus wachuncha tsukulhcha talakchiwini talajuni:

—Li kajunaw li Diosi ixlijuni, akintajunan: “¿P'us ch'i li nt'uch'a k'iklak'a'it'iti?” ³² Chi li kajunaw li wa ixjatapast'ak'atcha lapanak, chux an la'acha'an akintatayla'minan, mu yu'uncha tak'atsaayi li an Juan ixchiwinti Dios sawalhi ixlichiwini.

³³ Pus an Jesús ta'alhtaylh tajuni:

—Jantu ijk'atsayaw.

Pus yucha wachu jajuniy:


—Wachu ntu aktilajuniwi tuchini chunchacha iklihi'ilhtuy.

Pulhamacha'xan laj'ayaj k'atsanin lapanakni yu ixtalhist'ak'a lakaat'un

12 ¹ Tsukulhcha jaxa'alay wa laka pulhamacha'xani an Jesús, jajuniy:

—Pumatam lapanak ch'anlhi ix'uva chi kurrallhnuhcha, chi ja'ajnalhcha tan kapach'itkana', chi ilhtulhcha la'atam torre, jamalhistaknilhcha tichi yu'uncha lapanakni, chi yucha ma'atcha alh. ² Walh akxni chilhcha ixpaku an ix'uva, makminchalhcha pumatam yu kamilh inini yu ixnawincha. ³ Pero an yu

ixjamalhistaknikanta wa talakasamalhi an yu ixmala'achakantachalh, pus wachuncha tamala'achacho'olh. ⁴ An yu jamanawin a'tam mala'achapalhchalh pumatam ixma'tsuku', pero palaycha talakasamanilh, tamalakpak'atsanilh, chi stakcha tamamaxanilh. ⁵ A'tam mala'achapalhchalh pumatam, walh tama'ninilh. Chi ali'inchay yu ixjamala'achapalachalh, ixjama'ninikan chi ixjalaksamanikan. ⁶ Xli'astan wa pumatamcha yu sawalh ixmapayniy ists'alhi ixlit'ajun, pus yuchacha mala'achachalh, mu ixpast'ak'a li sna katakiklaka'iniyacha yucha. ⁷ Walh an yu ancha ixtajalhistaknan talajuni: “Yucha anicha jamanawin kuncho'oya an lakaat'un. Kama'niw, walh ki'anuchak'ani kuna'.” ⁸ Pus tach'apachalh, tama'nilh, ma'spacha an tan ixtalhistakta lakaat'uni takimaj'alh.



⁹ ¿T'asich'a lhiwilayat kalaya an yu jamanawin an tan ch'ankanta uvaja? Yucha kamina chi kajama'ni'oya an yu ixtajalhistaknan, ali'ini kajaxta'niya an lakaat'un an tan ixch'an ix'uva. ¹⁰ ¿Jant'u p'unawt'at'iti tacha an najunta tan an ts'o'muk'akanta an la ixchiwinti Dios? Tan najun:

An chiwx an yu tala'amaj'alh an yu tayajuy
 cha'a,
 apalij yucha palay lhitapalalh.

¹¹ ¡Lhi'a'nin! Yucha an Diosi chuncha ilhtulh.

Chi lhi'a'niyawcha li chunchacha la'tsinaw.

¹² Pus ixtach'apayawputuncha an Jesús, mu
 talhimacha'xalhi li yu'uncha jajuniy, pero wa
 tatalhanajlalh, mu lhilhuw, pus ta'ancho'olhcha.

Ixlimapalhlhi'ankat tanlhun

¹³ Tamala'achachalhcha ali'in fariseojnin chi yu
 ixt'apartidojnincha an Herodes an tan ixt'ajun an Jesús,
 para li tu'ucha kata'alh'a'taymalh. ¹⁴ Tala'cha'alh tajuni:

—Maestroj, ijk'atsayaw li sawalhi an yu na'un chi li
 nt'u xamat'i t'alhamni, mu uxint'i ntu yu lhak'ap'up'in
 tani tasuycha xamati', uxint'i ts'ajwi masuy an ixtij Dios.
 ¿Oxi li akmapalhlhi'aniw tanlhun an ay xajamach'alhkat
 la'acha'an Romaj u jantu?

¹⁵ Walh yucha mu ixjak'atsanicha li wa tajunicha, pus
 jajuniy:

—¿Tasu li wa kilalhila'ts'intanuyawcha? K'alhit'at'it
 a'xtami an tumin, akla'ts'ina'.

¹⁶ Pus talhicha'anilhcha chi jajuniy:

—¿Tisiyuchacha ani puwilh chi an ixta'a'ut?

Yu'uncha tajuni:

—Ix'anu an ay xajamach'alhkat Romaj.

¹⁷ Pus yucha jajuniy:

—K'axt'a'nitcha yu ix'anu an ay jamach'alhkat, chi
 yu ix'anu Dios wach'uch'a k'axt'a'nit.

Pus sawalhcha talhi'a'nilh.

Lhasakminti tanischa kalhila'awcho'okana'

¹⁸ An saduceojnin yu ntu takiklaka'i li
 kala'awcho'okana tala'cha'alh, tajuni:

¹⁹ —Maestroj, an Moisés kintats'o'nini an la ixchiwinti
 Dios li ma xamati niy ixt'ala'ajun chi li t'ajuni ixjamacha'a,
 pero li ntu tu'u ixjas'at'an, ma tamcha ixt'ala'ajuni

kat'atsukucho'olh, para li ma kat'ajamas'at'analhcha. ²⁰ Ixtat'ajun ixpumatujunk'an wa lhit'ala'awnin; an xa'aycha t'atsukukalhcha, walh nilh, tu tu'u jamakawlh ixas'at'an, ²¹ pus an yu ixt'ala'ajuncha yuchacha t'atsukucho'olh an t'aku', walh wachu nipalh, jantu tu'u ixjas'at'an jamakawpalh. Chi an ixlipumat'utucha t'atsukulh ixt'ala'ajunk'an wanajcha chun nipalh. ²² Sta tat'atsuku'olhi an ixpumatujunk'an an t'aku', chi talakni'olh, jantu tu'u tamakawlh ixjas'at'ank'an, ixli'astan an t'aku wachucha nilh. ²³ Akxni kala'awcho'okana, mu an ixpumatujunk'an tat'atsuku'olhi an t'aku, ¿tisiyuchacha ixjamacha'a kuna'a?

²⁴ An Jesús ja'alhtaylh jajuniy:

—Wa xliyu nt'u k'ats'ayat an ixchiwinti Dios, chi li yucha layi ilhtu'ojoy watuchicha, walh o'palaj xliyu k'a'ilht'ut yu ntu oxi. ²⁵ Akxni kala'awcho'okana, jantu xamati katit'atsukukalh, mu tacha an angelhnini kajun'okana'. ²⁶ Chi li sna nt'u k'ats'ayat'iti li kala'awcho'okana, ¿ch'u nt'u p'unawt'at'iti an la ixlibroj Moisés, tacha an xa'alalh Dios akxni ixla'xawt'ajun a'atam k'iw yu junkan zarza, tan junkalh a Moisés: “Kit'ini ixDios Abraham, chi Isaac, chi Jacob?” ²⁷ An Dios tu ixDiosk'an janinin, ixDiosk'an yu tala'ajunta. Uxitnan sawalhch'a lhits'an'ayat.

Ay lhamap'a'sin

²⁸ Pumatom xamaestroj lhamap'a'sin jala'cha'alh, mu ja'alha'asmat'acha li talakixtukuy, chi k'atsayi li oxi ja'alhtaylh an Jesús, pus lhisakmicha, juniy:

—¿Tanyucha yu palay ay lhamap'a'sin?

²⁹ An Jesús juniy:

—Tan an najunta: “Israel, k'a'asmatt'i; an kiJama-ch'alhkatk'an Dios, wa pumatam. ³⁰ Chi k'amap'ayniya'a a mijamach'alhkat Dios chux la mijalhunut, chux la mintak'atsan, chux la mijatapast'ak'at chi chux la mintachaput.” Yucha yu ay lhamap'a'sin. ³¹ Ixlitipat'uy wa ixt'atamcha lanan, “k'amap'ayniya'a mint'alapanak

t'ach'a map'aynik'an mi'akstu.” Ani la'at'uy lhamap'a'sin yucha yu laj'ay, tu tu'u atumpaj.

³² Wachuncha an xamaestroj lhamap'a'sin juniy:

—Chun sawalhi Maestroj, t'ach'a an na'un li wa pumatami Dios, jantu tu'u t'awpalay, ³³ chi li kamapaynikalhi chux laka jalhunut, chi chux laka jatapast'ak'at, chi chux laka tak'atsan, chi chux laka tachaput, sawalh. Chi li akmapayniwi kint'alapanakk'an tacha ikmapaynikanaw, palay lhitapalay, walh jantu masi chux tacha an jama'nikan jatapakxat chi jala'xawakancha laka pusantuj.

³⁴ An Jesús, mu la'ts'incha li oxi tacha an ja'alhtayanalh, pus juniy:

—Jantu ma'ati t'a'un an la ixlich'alhkat Dios.

Wachuncha jantucha xamati k'is tapujucho'olh kalhisakmilh tu'u'.

¿Tisiyuchacha ists'alh an Cristoj?

³⁵ Akxni ixmasuy an Jesús an laka tajtan ixjajuni:

—¿Tasu li tanajuncha an xamaestrojnin lhamap'a'sin li an Cristoj ists'alh Daviti? ³⁶ Pero mu an David yucha nawpalay akxni machiwinilh an ixTakuwin Dios, najun:

An Jamach'alhkat juniy an kiJamach'alhkat:

Tan oxicha kimpa'xtiy ak'imp'ikt'ut'a'ulh,

sta akxni ajkamama'oyacha la mijach'aja an yu wa taxkayan.

³⁷ An David yucha najun li an Cristoj ixjamach'alhkat, ¿tasicha li ists'alh a'tami?

Pus tacha an wanajcha lhilhuw ts'anaks ixlakyakalh sawalhcha ixta'achani ixta'alha'asmat'a an Jesús.

An Jesús ja'alhtasuy an xamaestrojnin lhamap'a'sin

³⁸ Ixjamap'a'siy ixjajuni:

—K'ajalajk'ats'anant'it, mu an xamaestrojnin lhamap'a'sin sawalhcha ta'achaniya tala'la'ch'iy la'lhman ixta'ch'itk'an, chi ta'achaniya kajala'axa'alakalh laka tiankis. ³⁹ Chi tan p'ulhnaja talaktawlhputunachalh

an laka laktajtan, chi tan alin k'atan tan lakwaykan.
 40 Yu'uncha yu wanajcha tamaxtuni'ojoy ixcha'ak'an an yu ntucha tu'u ixt'apapak'an t'akunin. Chi sawalhcha oxi lapanakni talay, panijnicha tatapayni. Yu'uncha palay ay lhima'alh'ajna kajaxta'nikana'.

Ixla'ulan t'aku yu maticha ixt'apapa'

41 An Jesús sa'cha ixwilh lhilaxlakapu an caja tan ixtamujuy ixla'ulank'an an lapanakni, sa'cha ixjala'ts'in, ixpumalhuk'an an yu jamatuminin la'lhuiwix ixtamujuy.

42 Walh cha'alh pumatam jakilhpatinij t'aku yu maticha ixt'apapa, wachu mujulh a'xt'uy lakt'ikt'i ixtumin.

43 Wachuncha an Jesús jaxa'alalhi an ixt'alhtanan, chi jajuniy:

—Ani jakilhpatinij t'aku yu ntucha tu'u ixt'apapa palay mujulh, walh jantu an ali'in. 44 Mu yu'uncha wa xaxajnichamujulh; pero ani t'aku, masi wa ixkilhpatitcha muju'olhi yu ixch'apata, chux yu kaxlitamawwaylh.


An Jesús najun li kalakt'ilhikana an tajtan

13 1 Akxni taxtucho'olhcha an laka tajtan an Jesús, pumatam ixt'alhtana juniy:

—¡Maestroj, k'ala'ts'i an chiwx chi an cha'a wa lajk'usicha!

2 Alhtaylh an Jesús juniy:

—T'ach'a ani la'ts'in laj'ay cha'a, wanaj kama'ta'okana', tu tu'u masi wa katila'ukxtawk'atawilhcha chiwx.



Yu kalaktapasaya akxni ukla'ot'ajuncha an lakamunulhpa'

³ Chi akxni sa'cha tawilh an Jesús an a'stitawk'a tan junkan Lakaa'olivojnin, lhilaxlakapu an tajtan, an Pedroj chi an Jacoboj chi an Juan chi an Andrés wa ixpu'akstuk'an talhisakmicha, ⁴ tajuni:

—¿Tasu wanancha chuncha katapasaya'a? ¿Chi tasucha aklhik'atsayaw akxni chunchacha kalaktapasaya'a? Akilajuniw.

⁵ An Jesús ja'alhtaylh tsukulhcha jajuniy:

—K'ajalajk'ats'anant'it, para li ntu xamati kata'o'xcho'on. ⁶ Mu ixluk'ani katamina yu katanawna li yu'uncha Cristojnin, chi ixluk'ani katata'o'xcho'oya'.

⁷ Akxni k'ak'ats'aya'itcha li lat'alhkancha awint'i u aniy, jant'u k'alakt'alhanant'it, mu chunchacha yu katapasaya', pero ntuka' yu ixpu'ukla'ojon. ⁸ Mu la'atam ay la'acha'an kat'alasaya la'atam ixt'a'ay la'acha'an chi pumatam ay jamach'alhkat kat'alasaya pumatam ixt'a'ay jamach'alhkat chi watanchuncha kalaklaya an lakaat'un chi ka'alina chawan. Yucha wa kapu'a'tayniyaka an lhima'alh'ajna.

⁹ Pero uxitnan, uxitnani k'alhak'ap'up'ink'ant'it, mu k'ama'axt'a'k'ana'it'it laka lakjamach'alhkat, chi k'a'ayna'k'ana'it'iti tan tata'ayxto'ojoy an lapanakni, chi ixlakapuk'an an jamach'alhkatni k'alhip'ink'ana'it'it kilakata. Akxniy lay k'aja'una'it an laj'oxi chiwinti.

¹⁰ Task'iniya li an laj'oxi chiwinti katilhichiwin'okalhcha p'ulhnaja ta killmakchux an lapanakni, xli'astan ka'ukla'oyacha. ¹¹ Chi akxni ma'axt'a'k'ana'it'it, jant'u k'alhak'ap'up'it'iti t'ani k'anawna'itcha, k'anawna'it yu anchacha katamapast'ak'aniyan an ixTakuwin Dios, mu ntu uxitnani k'at'ichiwinint'it yucha an ixTakuwin Dios.

¹² Akxni masi yu tam mint'ala'ajunk'an katama'axt'a'ani laka lhinin, chi tam xapay kama'axt'a'a masi ists'alh; chi katat'ala'ayacha an ixpaynink'an an xajas'at'an, katama'niya ixlakpaynink'an. ¹³ Tucha k'is k'at'ila'ts'im-p'ut'unk'ant'iti kilakata, pero yu kalhitayaniya, yucha

kata'alhtaxtuya'. ¹⁴ K'ala'ts'ina'itcha an ay tuchichun yu ntu k'is lhitayanikan la'ts'inkan yu lhichiwinilh an Daniel, yu ixlchiwini ixchiwinti Dios. Anchunu ay tuchi-chun ka'ulakanacha tan tu ixlitask'inin katawilh, (yu punajun kalhimacha'xalhcha), pus yu katatsukuya lakaa-t'un Judea, kata'os'alhcha an lakaa'a'stitawk'an. ¹⁵ Chi yu uk'achalh la ix'a'sti ixcha'a, jantu kata'alhtajulh, tu ka'alhi maxtunu tu'u'. ¹⁶ Chi yu t'awnachalh laka kuxtu, jantu ka'alhi xa'a'ini ixpu'ayxt'a'kan. ¹⁷ ;Sawalhcha lhima'anxkayi yu akxni tukan ja'aynanta t'aku', chi yu ixt'a'akxni talhit'ajun ixjas'at'ank'an yu tats'ik'ika'!
¹⁸ K'at'ap'aynit'it, para li ntu akxni ixpaku lhik'asnini k'aja'osnunt'it. ¹⁹ Mu ay lhima'alh'ajna ka'alina', tacha yu ntu a'tam alinta sta wa tawanancha ilhtutachalh an lakamunulhpa an Dios, sta chaway, chi ntu a'tam chun katitapasacho'olh. ²⁰ Li ntu kaxlalakat'ikt'ilhi an xapanch'e'ex lhima'alh'ajna an Dios, jantu xamati ixta'alhtaxtulh, pero mu jamapayniya an Dios an yu jasakxtutacha, pus kalalakat'ikt'iya an xapanch'e'ex ma'alh'ajnat. ²¹ Li xamati tajunan yucha aniya Cristoj u anucha t'awnachalh an Cristoj, jant'u k'alhak'ap'up'init'it. ²² Mu katamina yu ntu sawalh Cristojnin chi yu ntu sawalh ixchiwinti Dios talhichiwiniy, chi layi kata'ilh-tuya yu la'li'a'nin tu'u para li kataja'o'xcho'onulh, chi li lay, masi an yu jasakxtutacha Dios kata'o'xcho'oya'. ²³ Pus chaway klamak'atsaniwcha, ;k'ajalajk'ats'anant'itcha!

Akxni kamina an yu kijunchilh isTs'alh Lapanak

²⁴ 'Chi anchunu panch'e'ex, xli'astancha an ay lhima'alh'ajnat, an wilhchan kataputs'isiya', chi an malhkuyu jantucha katimapulhkuh. ²⁵ Chi an st'akunin katapatajuya', chi an tanlhuncha yu talhit'ajun ix'a-lhp'asnintik'an awint'i lakt'iyan kajalakchikixkana'. ²⁶ Wachuncha an yu kijunchilh isTs'alh Lapanak, sawalhcha alhp'asi kala'ts'istukkana kamina an laka jataputs'i, chux la ixta'ayaxtu. ²⁷ Chi an ix'angelhnin, kajamala'achayacha li katamach'ixtamilhcha an yu

jasakxtutacha, ta ixlijalhi'ay an lakamunulhpa chi an lakt'iyán.

²⁸ K'ap'u'ichi'itcha jatapast'ak'ati tacha an lhichiwinkalh xak'iw higo. Akxni kilhajas'at'alatacha, chi xajnich'o'ycha sast'i xax'oy, k'ats'ayatcha li wa nicha ixpaku lhi'ichi. ²⁹ Xliyu li akxni k'ala'ts'ina'itcha kalaktapasaya tacha an klajuniw, k'ats'ayatcha li wa nicha laka maticha ikminta. ³⁰ Chi klajunaw, chunchacha p'ulhnaj kalaktapasa'oya akxni ntuka' talakniy an lapanakni yu chaway tat'ajun. ³¹ An lakt'iyán chi an lakaat'un ka'ukla'oya', pero an kinchiwinti jantu. ³² Chi tuchi wilhchancha chi panch'e'exi chuncha katapasaya, jantu xamati k'atsay, masi an angelhnnin awint'i lakt'iyán chi an isTs'alh Dios, wa yucha an ixPayi k'atsay.

³³ K'as'alaj ts'uk'ut'it chi k'at'ap'aynit'it, mu nt'u k'ats'ayat'iti tani wanancha chuncha katapasaya'. ³⁴ Tacha xamati lapanak yu ka'alh ma'at, chi an ixma'tapatsanin kajamalhistaknilhcha an ixcha'a', chi atamj atamjcha yu la'tapatsay. Chi an yu jalhistaknan laka malhticha, kajunkalh li kas'alaj tayalh. ³⁵ K'as'alajnant'it, mu nt'u k'ats'ayat'iti tani wanancha kamina an yu jamacha'a', sna ta'oxay, u jaytatnan, u akxni t'asaycha puyux, u wats'isin. ³⁶ Para li ntu akxni laklht'at'ayat'iti wa puwalas kachilh. ³⁷ Chi ani klajunaw para lhichux, k'as'alajnant'it.

Ta'o'xcho'och'apayawputun an Jesús

14 ¹ Wa la'at'uycha wilhchani ists'an'ay para kachilhcha ixpaku paxku chi ixk'atan pan yu ntu lhiyalh lhamaskajan. An xalaj'ajin sacerdotejnin chi an xamaestrojnín lhamap'a'sin ixtalhipuxkaw nicha tani katalhi'o'xcho'och'apayawlhcha an Jesús, para li katama'nilhcha. ² Chi ixtalajuniy:

—Tukan laka k'atan jantu, para li ntu kach'ilili talaknawlh an lapanakni.

Pumatam t'aku lakamuk'alh perjumej an Jesús

³ Pero an Jesús, la'acha'an Betaniaja ixt'awnachalh, la ixcha'a Simón, yu ixlakap'uch'i'ojota la ixts'its'i, sa' ix'wilh laka mesaj. Walh cha'alh pumatam t'aku ixli'anta la'atam lhaklhi perjumej laxafrasco sawalh k'usi, yu wanaj la'lhuw, a't'olhicha chi ukmuk'alhcha an Jesús.

⁴ Walh an ali'in talhitalh'amalh, tanajun:

—¿Tasu li wa lhitama'chapuycha an perjumeje?

⁵ Yucha layi ixlist'akalh tacha lhajay pumatam lapanak la'at'utu cientoj wilhchan chi ixjamala'pitsinikalhcha an jakilhpatinin.

P'ulu p'ulucha ixtalhichiwiniya an t'aku'.

⁶ Pero an Jesús jajuniy:

—K'amak'a'unt'itcha; ¿t'asu li ma'ach'ap'uyatcha?, li mu yucha oxi tacha an ki'ilhtulh. ⁷ Uxitnan lhilhiji k'ajala'ts'ina'it an jakilhpatinin, layi k'ajaxt'a'niya'it tu'u akxni jaxt'a'nip'ut'unat'it, pero kit'in tu lhilhiji akintilala'ts'iw. ⁸ Ani t'aku ilhtulhcha yu lay, mu la'asiyaj kilakamuk'alhcha an perjumej para li akxni akimaknukana'. ⁹ Aniy sawalhi an yu klajunaw, watanchuncha kalhichiwinkana ani laj'oxi chiwinti, chux lakaamunulhpa, wachu kalhichiwinkana an yu ilhtulh ani t'aku', para li kalhipastakkalh.

An Judas ma'axta'lhi an Jesús

¹⁰ Wachuncha an Judas Iscariotej, xapumatam an ixpumakawt'uyk'an ixt'alhtanan an Jesús, jala'alhi an xalaj'ajin sacerdotejnin, chi jajunicha li kajama'axta'niya an Jesús. ¹¹ Pus yu'uncha akxni ta'alha'asmatlhi talaj'a-chalhcha, chi tajuni li kataxta'niya tumin. An Judas ixlipuxkawnicha tani kalhima'axta'lhicha an Jesús.

**An Jesús jalakt'awaylh an
ixpumakawt'uyk'an ixt'alhtanan**

¹² Ixlila'atamcha wilhchan ixk'atan pan yu ntu lhiyalh lhamaskajan, akxni ma'nikancha borregoj para Paxku, an ixt'alhtanan an Jesús tajuni:

—¿T'anisch'a lak'ask'in ak'aw jala'oxinin para li k'awaycha laka Paxku?

¹³ Pus yucha jamala'achalhcha ixt'uyunk'an ixt'alhtanan, jajuniy:

—K'ap'inchi'it an la'acha'an, chi k'ap'axt'o'a'it pumatam lapanak yu lhi'anta ixkan la ix'uyuli', k'ach'a'o'aya'it. ¹⁴ Tan katanuyanta k'a'una'it an yu jamacha'a lapanak: “An Maestroj najun: ¿tanischa laka cuartojo tan ajkat'alakwayna an kint'alhtanan ixlakata Paxku?” ¹⁵ Yucha katamasuniyan pulaktam aya cha'a talhman ixlitala't'uycha , sawalhcha oxi ilhtukanta, anchacha k'ajala'oxinina'it para kitnan.

¹⁶ Pus ta'alhcha an ixt'uyunk'an ixt'alhtanan. Tacha'alhcha an la'acha'an, walh tala'cha'alhcha an lapanak, tacha an ixjajunita an Jesús, chi tajala'oxinilhcha ancha ixlakata an paxku. ¹⁷ Akxni taputs'isilhcha jat'acha'alhcha an ixpumakawt'uyk'an ixt'alhtanan, ¹⁸ chi talaktawilhcha, tsukulhcha talak'wajini an laka mesaj, walh an Jesús jajuniy:

—Sawalhi ani yu aklajunaw, xapumatam yu uxitnani akima'axt'a'a', yu wachu kint'alak'wayt'ajun.

¹⁹ Wachuncha tsukulhcha tala'ta'oxila'alhi, chi atamj atamjcha talhisakmiy, tajuni:

—¿Kit'in sna'?

²⁰ Yucha jajuniy:

—Xapumatam uxitnan ani mimpumakawt'uyk'an, yu kint'atamaj'oy laka pulatoj. ²¹ Mu kit'in yu ikminta juna wa tacha isTs'alh Lapanak, ts'awj sawalhi iktit'a'an tacha an lhits'o'muk'akanta la ixchiwinti Dios; ¡pero anchunu

lapanak yu akima'axt'a'a, paynicha, palay oxi ntu ka'istsukulh!

²² Chi ixtalak'wayt'ajunka, an Jesús xa'a'ilh a'xtam pan, xta'lhicha lhimala'puchajun chi la'ch'e'elhcha, jala'xta'nilhcha, jajuniy:

—K'a'utcha, aniy kilakatunaj.

²³ Chi xa'a'ipalh vasoj yu ixputajun xaxkan uvaj, wachu xta'palhi lhimala'puchajun, chi jaxta'nilhcha, tapulaj'otlhicha ixchuxk'an. ²⁴ Jajuniy:

—Aniy kijak'alhni, yu sast'icha putamakawkan li ixluk'ani ijkalhimaj'an kijak'alhni an tacha t'awkan.

²⁵ Kit'in klajunaw yu sawalh, tu ali akti'otlhi an xaxkan uvaj, sta akxni akcha'ana an tan ch'alhkatnan Dios, akxniy ak'otcho'oya yu sast'i.

An Jesús najuni li an Pedroj kanawna li ntu mispay

²⁶ Akxni talakmilhpa'olhcha la'atam milhpat, ta'alhcha an a'stitawk'a tan junkan lakaa'olivojnin. ²⁷ An Jesús jajuniy:

—Chaway ani jata'oxana wanaj akilamakaw'oyaw, mu ts'o'muk'akanta an la ixchiwinti Dios tan najun:

Akma'niya an yu jalhist'ak'a ixborregojnin, chi an ixborregojnin wanaj tilh katata'a'pitsi'oya'.

²⁸ Pero akxni akla'awcho'oya kit'ini aklatap'ulhniyaw ak'ana xalakaat'un Galileaj.

²⁹ Wachuncha an Pedroj juniy:

—Masi katamakaw'ojon, kit'in jantu.

³⁰ Pus an Jesús juniy:

—Uxint'i masi ch'unch'ach'a na'un, ani katats'isiya akxni ntuka' a't'uy t'asay pullux, a't'utu k'anawna'a li nt'u k'limisp'ay.

³¹ Pero yucha ali juniy:

—Masi k'ama'nik'a chi kit'in wachu, jantu aktimakajun.

Chi an ali'in wachu chuni tajunilh.



An Jesús tapayni laka palakch'anan tan junkan Getsemaní

³² Wachuncha ta'alhcha tanchun tan jalakch'ananan-kanta tan junkan Getsemaní, jajuniy an ixt'alhtanan an Jesús:

—K'alakt'awlatka aniy, kit'in ikti'an tapaynini'.

³³ Jat'a'alhcha an Pedroj chi an Jacoboj chi an Juan, walh tsukulhcha ta'oxila'alhi. ³⁴ Jajuniy:

—Sawalhcha ta'oxila'alhiya an kintak'atsan, watacha akniyacha ijk'atsan; akilapakxaw aniy, jant'u k'alaklht'at'at'it.

³⁵ Lanancha ma'ati alh, lilijcha tatso'ottalh chi tamuntitachalhcha, tsukulhcha tapayni, najun li sna ma layi kamala'pusunikalh an makxkay panch'e'ex yu ixmininita akxni. ³⁶ Najun:

—KimPay, kimPay, uxint'i ntu tu'u yu ntucha lay k'a'ilht'u; ak'ima'osunini ani lhima'alh'ajna, pero yu tacha uxint'i lak'ask'ini kawalh, jantu yu tacha kit'in iknajun.

³⁷ Walh akxni jala'cha'ancho'olh an ixt'alhtanan, ixtaalaklhtatanancha, pus juniy an Pedroj:

—Simón ¿lht'at'ay, jantu layi masi wa tam horajcha k'alhit'ayanin jant'u k'alht'at'a? ³⁸ K'at'ap'aynit'it chi k'ak'ujt'it, para li ntu k'alhila'ts'int'anuk'ant'it; mu an takuwin ilhtuputuni yu lhijunkan, pero an lakatunaj yucha yu ntu k'ut'ilh.

³⁹ A'tam ampalhi tapaynini an Jesús, wanajcha chuni nawpalh tacha an ixnajuntacha p'ulhnaj. ⁴⁰ Walh a'tamcha ixtaalaklhtatanampalayi an ixt'alhtanan akxni jala'cha'ancho'opalh, mu wa sawalhcha ixtaputawlachilh ilhtatapututk'an, chi ntucha ixtak'atsay tani katajunilhcha an Jesús. ⁴¹ Ixli'a't'utucha jala'cha'alh jajuniy:

—K'alaklht'at'atcha, k'ast'aknantcha. Oxicha, chilhcha panch'e'ex; kit'in yu ikminta juna tacha isTs'alh Lapanak akima'axta'kanacha la ixmaknik'an an la'ma'lhta'alhinin lapanakni. ⁴² K'alaj'ost'ayatcha, ka'awcha, yucha anicha minta yu akima'axt'a'a'.

Ch'apayawkalhcha an Jesús

⁴³ Ixchiwint'ajunka an Jesús, la'cha'alhcha an Judas, xapumatam an ixpumakawt'uyk'an ixt'alhtanan, ts'ana-nacha tat'acha'alhi ali'in lapanakni, ixtalaklhi'antacha ix'espadajk'an chi ixk'iwk'an. Yu'uncha an xalaj'ajin sacerdotejnin chi an xamaestrojnin lhamap'a'sin chi an laktatanincha ixtamala'achata. ⁴⁴ Chi an Judas la'asiyaj ixjajunitacha tani ma kajalhimasuniyacha:

—Yu akla'xtikilhtast'uk'a, yucha, k'ach'ap'ayaw-ya'itcha chi k'alhip'ina'itcha.

⁴⁵ Pus akxni la'cha'alhcha, juniy:

—Maestroj, Maestroj.

Chi la'xtikilhtastuklhicha.

⁴⁶ Wachuncha t'o'cha tala'alhi an Jesús chi tach'apayawlhcha. ⁴⁷ Pero pumatam yu ancha ixma'yalh, xtalaj xa'axtulhi an ix'espadajk, xtalh akatuch'uk'up'uxli an ixt'atapatsan xa'ay sacerdotej. ⁴⁸ Chi an Jesús jajuniy:

—Watacha wa p'uxk'awyatcha ja'alhawna t'ant'at li kilach'apayawputunaw. Laklhit'ant'atcha mi'espadajk'an chi mink'iwk'an. ⁴⁹ Lhilhiji xaklala'cha'anaw xakmasuy an laka ay tajtan, walh akxni ntu kilach'apayaju; pero wa xliyu li chuncha kuna tacha an ts'o'muk'akanta la ixchiwinti Dios.

⁵⁰ Wachuncha tamakaw'olhi an ixt'alhtanan an Jesús, talakats'alalhcha.

Pumatam ts'alh yu osli

⁵¹ Pero pumatam ts'alh ch'a'o'alhi'alh, ixla'axt'a'kanta laka sábanaj; walh tach'apayawlh, ⁵² pero ayputaxtu-makawli an sábanaj, ix'alhalhanti osli.

An Jesús talhicha'alhcha tan talakchiwini an xalaj'ajin jamach'alhkatni

⁵³ Talhicha'anilhcha an Jesús an yu tukancha xa'ay sacerdotej, pus anchacha tata'ayxto'olh an ali'incha xalaj'ajin sacerdotejnin, chi an laktatanincha, chi an xamaestrojnin lhamap'a'sin. ⁵⁴ An Pedroj wa ma'atcha ixch'a'o'alhi'anta sta ixpulakni an tan jalhi'ay la ixjata-lakxtut an tukancha xa'ay sacerdotej, chi ixjat'ala'-s'onwilhcha an yu ixtajalhistaknan laka tajtan. ⁵⁵ Walh an xalaj'ajincha sacerdotejnin chi ixchuxk'anacha an yu ancha ixtatanumanalh, ixtalhipuxkaw nicha tani katalhima'nilhcha an Jesús; pero ntu tu'u ixtala'cha'anini yu ntu oxi. ⁵⁶ Mu ixluwk'ani yu ixtalhimuk'ay yu ntu sawalh, pero tacha an ixtalhimuk'ay tu watami ixtanajun. ⁵⁷ Wachuncha ali'in tatayalh, talhimuk'alhcha yu ntu sawalh, tanajun:

⁵⁸ —Kitnan k'alha'asmattawi tan najun: “Aklakt'ilhiya ani ay tajtan yu wa laka maka yawkanta, chi ixlila'at'utu wilhchan akla'oxicho'oya yu ntu wa laka maka yawkan.”

⁵⁹ Pero masi chuncha ntu wa tami tacha an ixtalhimuk'ay. ⁶⁰ Pus an tukancha xa'ay sacerdotej japujatayalhi ixtan'ajnik'an, chi lhisakmicha an Jesús, juniy:

—¿Jantu tu'u k'at'ija'alht'ayan? ¿Tisuncha tacha ani talhimuk'ayani?

⁶¹ Yucha ntu ja'alhtayanalh. An tukancha xa'ay sacerdotej a'tam lhisakmipalh, juniy:

—¿Uxint'i yu Cristoj, isTs'alh Dios?

⁶² Pus an Jesús alhtaylh juniy:

—Chun kit'in; chi kit'in yu ikminta juna watacha isTs'alh Lapanak akilala'ts'inawi akxni akpiktutawlanta an kimPay tan ch'alhkatnan, chi akxni akminanta an lakt'iyan laka jataputs'i.

⁶³ Wachuncha an tukancha xa'ay sacerdotej, la'lh'alhi an ixla'ch'it wa xliyu talh'amalhcha, chi najun:

—¿Tisu wa tiyuchacha ali ma'lhtask'iniyaw ali akintajunini? ⁶⁴ Alha'asmat'at'itcha tacha an wa aya juniy Dios. ¿T'asuch'a nawnat'iti?

Pus ixchuxk'ani talakt'asa'olh, tanajun li ma kama'nikalhcha.

⁶⁵ Tsukulhcha tala'achuj'wayi an ali'in, chi tala'puch'ilhcha, ixtalakasamaycha, ixtajuni:

—¡K'alhajachicha tichini muk'anincha!

Chi an yu ixtajalhistaknan laka tajtan wachucha lo's lo's ixtala'xtisay.

An Pedroj najun li ntu mispayi an Jesús

⁶⁶ An Pedroj talaktsini ixt'awnachalh tan jalhi'ay, walh cha'alh pumatam t'aku ixma'tsuku an xa'ay tukan sacerdotej, ⁶⁷ pus la'ts'incha tan is'on'wilh an Pedroj, chi juniy:

—Uxint'i wach'u anch'a ixt'a'aklat'a'un an Jesús yu jamacha'a Nazaret.

⁶⁸ Yucha najun ma jantu, najun:

—Tu ijk'atsay t'uch'ini unicha, kit'in tukmispay.

Walh taxtulh an tan putanukanachalh, asmat'a t'asaycha an pullux. ⁶⁹ Walh an t'aku a'tam sa' la'ts'impalayi an Pedroj, pus jalakjunicha an yu ancha ixtat'ajun:

—Ani wachu de yu'uncha.

⁷⁰ Pero an Pedroj a'tam nawpalay ma ntu sawalh. Pants'ik'ischa walh, an yu ancha ixtat'ajun a'tamcha tajumpalayi an Pedroj:

—Chun sawalh, uxint'i de yu'uncha ; mu galileojk'at'i, chi wachu chuni ch'iwiniy.

⁷¹ Pus akxni tsukulhcha wa aya najun, chi ixnajuncha li ma sawalh:

—Tukmispayi an lapanak yu llich'iwinat'it.

⁷² Walh t'asalhcha an pullux ixli'a't'uycha, wachuncha pastaklhicha an Pedroj tacha an ixjunita an Jesús: “Jantuka' a't'uyi katit'asalh an pullux, a't'utucha k'anawna'a li nt'u k'imisp'ay.” Pus sa'cha lhatapastak-nani an Pedroj, tsukulhcha alhun.

An Jesús talhi'anilhcha an Pilatoj

15 ¹ Sawalhka wats'isin, tata'ayxto'opalhcha an xalaj'ajin sacerdotajn, chi an laktatanincha, chi an xamaestrojn lhamap'a'sin, chi ixchuxk'an an israelitajn yu ixtach'alhkatnan la ixla'acha'ank'an. Tach'ilhi'anilhcha an Jesús an Pilatoj. ² An Pilatoj lhisakmiy, juniy:

—¿Uxint'i ixrejk'an judiojn?

Yucha alhtaylh juniy:

—Uxint'ich'a nawt'a'un.

³ Pus an xalaj'ajin sacerdotajn sawalhcha ixtalhimuk'ayi wa tanlhuncha maslakatinti, pero an Jesús tu tu'u ja'alhtaylh. ⁴ A'tam lhisakmipalhi an Pilatoj juniy:

—Tacha an stak talhimuk'ayan, ¿jant'u tu'u k'at'ija'alht'ayan?

⁵ An Jesús masi chuncha ntu k'is ja'alhtayanalh; pus an Pilatoj ixli'a'nicha.

T'acha'ankalhcha li an Jesús katama'niyacha

⁶ An Pilatoj akxni k'atan ixjun ixmakajuni watichicha tach'in yu ixtask'ini an lapanakni. ⁷ An laka pulach'in ixtanun pumatam tach'in ixjuncan Barrabás, ixjat'atanun

ixkompañerojnin yu ixtat'ajama'nininta akxni tat'alasalh jamach'alhkatni. ⁸ Ts'anan tala'cha'alhi an Pilatoj, tajuni li ma tacha a'tajcha ilhtuyi ka'ilhtulh. ⁹ Pus an Pilatoj jajuniy:

—¿Lak'ask'inat'iti li akmakawlh an ixrejk'an judiojnin?

¹⁰ Chuncha jajunilh an Pilatoj mu yucha ixjak'atsaniya li an xalaj'ajin sacerdotejnin xliyu ixtalhima'axtani an Jesús li wa ixtaxkaji. ¹¹ Wachuncha an xalaj'ajin sacerdotejnin tachiwiwalhi an lapanakni para li katajunilh an Pilatoj li yucha an Barrabasi kamakawlh. ¹² Pus akxni jaxa'alapalh an Pilatoj, jajumpalay:

—¿Pus t'asuch'a nawnat ak'ilhtulh an yu unat li ixrejk'an judiojnini?

¹³ Yu'uncha ixchuxk'ani talakt'asa'opalh tanajun:

—¡K'amakxt'ukmuk'acha laka cruz!

¹⁴ An Pilatoj jajuniy:

—¿Tisuncha tala'alhini ilhtuta?

Pero yu'uncha wa palay p'as ixtalakt'asapalay ixtanajun:

—¡K'amakxt'ukmuk'acha laka cruz!

¹⁵ Pus an Pilatoj mu sa'cha ixja'ulaputuni an lapanakni tacha an ixtala'talh'amanta, jamakawnilhcha an Barrabás. Chi an Pilatoj lhinawlhcha an Jesús li kastakcha ta'ayna'lhi, xli'astan ma'axta'lhicha para li kamakxtukmuk'akalhcha.

¹⁶ Wachuncha an soldadojnin talhi'alhcha tan jalhi'ay junita an laka ay cha'a tan tawlay jamach'alhkat, chi tat'alat'asanilhcha an ali'in ixt'asoldadojnink'an.

¹⁷ Tamala'ch'inilhcha xmumu la'ch'it, chi tama'tanulhcha koronaj de jalhtukun. ¹⁸ Tsukulhcha tamat'asay ixtajuni:

—¡Tunku'uncha Ixrejk'an judiojnin!

¹⁹ Chi ixtala'pana'acha laka aktiyak chi ixtala'achuj'waycha chi ixtatatso'ottanicha, chi ixtatapayninicha. ²⁰ Akxni stakcha tamamaxani'olh, tamaxtunicho'olhcha an xmumu la'ch'it chi tamala'ch'inicho'olhcha an yu ixla'ch'it tukan. Xli'astan talhi'alhcha tan tamakxtukmuk'alhcha laka kruz.

Makxtukmuk'akalhcha an Jesús chi nilhcha

²¹ Pumatom lapanak yu ancha ixla'pust'ajun, wa tanuchilhka an la'acha'an, junkan Simón, jamacha'a Cirene, ixpayk'an Alejandro chi Rufo, ta'asi t'amalhi'anilhi an ixkruz an Jesús, ²² tanchun junkan Gólgota, nawputun la ixla'pa'axi sue'elukut. ²³ Chi ixtama'ot'oputuncha jamaskajanti xaxkan uvaj yu ixtalhiyawnta lhaklhi perjumej junkan mirraj, pero ntu otlhi. ²⁴ Akxni tamakxtukmuk'alhcha an Jesús, an soldadojnín talamala'pitsilhcha an ixla'ch'it, wa ta'amanalh suertej, para li tuchini katalhi'alhcha atamj atamj. ²⁵ Wats'isini tamakxtukmuk'alh, katacha las nuevej. ²⁶ An la ix'akpuxni ixtats'o'nitacha tuchini ixtalhi'alhtasuycha, ixtats'o'nita: Ixrejk'an judiojnín. ²⁷ Wachu jat'amakxtukmuk'akalh ixt'uyunk'an ja'alhawnan, ixtapiktutamincha ixjat'ayawkanta tan la ixkruschak'an wachu'. ²⁸ Ts'awjcha tapasalh tacha an najunta la ixchiwinti Dios, tan najunta: “Wa tachanu wa aycha ma'lhta'alhini wachu talhimalakxtulh.”


²⁹ Yu ancha ixtala'pusa xkayajcha ixtajuni chi wili, wilicha ixtatalakpayajuy, ixtalhíts'i'íncha an Jesús. Ixtajuni:

—¡Jijwa, li uxint'i yu lay k'alakt'ilhi tajtan chi k'ayawch'o'o wa la'at'utu wilhchan! ³⁰ ¡Chaway k'ama'alht'axt'uk'acha mi'akstu, chi k'at'a'alht'a'ut'icha an laka kruz!

³¹ An xamaestrojnín lhamap'a'sin chi an xalaj'ajin sacerdotejnín wachucha ixtamamaxaniy, ixtalajuniy:

—Ali'in jama'alhtaxtulh, walh yucha ntucha layi ma'alhtaxtukan ix'akstu. ³² ¡Kata'alhtajulhcha an laka kruz an Cristoj, xarrej Israel, kala'ts'inawcha, chuncha kakiklaka'iyawcha!

Chi masi an yu anchacha ixjat'amakxtukmuk'akanta, wachu ixtamamaxaniya an Jesús.



Nilhcha an Jesús

³³ Atunkulhcha, taputs'isi'olhi chux an lakaat'un, sta las tres akxni ta'oxaycha. ³⁴ Pus las trescha an Jesús, p'ascha t'asalh, najun:

—Eloí, Eloí, ¿lama sabactani? (nawputun: KiDios, kiDios ¿tasu li k'imak'a'unt'acha?)

³⁵ Akxni ta'alha'asmatlhi an yu ancha ixtayanalh, talajuni:

—¡Jo! k'a'alha'asmatt'it! T'asani an Elías.

³⁶ Pumatam jats'alaj'alh, awalh la'atam wa tacha panimak laka vinagrej, chi kinkach'imuk'alhcha laka ma'atam aktiyak, puma'ot'ulhcha, chi jajuniy an ali'in:

—K'amak'a'untcha, kala'ts'inawcha li kamina ma'alhtajunu an Elías.

³⁷ Walh an Jesús p'asi chiwimpalh, nilhcha. ³⁸ Wa akxni an la'ch'it yu ix'uk'alh an laka tajtan lht'it'in tapu'exli, aklht'uyi walh, an talhmani pu'a'taynichalh sta talaktsin. ³⁹ An ixkapitank'an an soldadojnin oxilats'ilh an Jesús akxni t'asalh chi nilh, pus najun:

—Chun sawalh, ani lapanak isTs'alhi an Dios.

⁴⁰ Ali'in t'akunin wachu ani ixtayanalh wa ma'atcha ixtalaka'an. Ancha ixma'yalh an María Magdalena, chi an María ixnatik'an Jacoboj xalakat'ikt'i chi José, chi pumatam t'aku yu ancha ixjat'ayapalh yucha an Salomé. ⁴¹ Ani t'akunin ixtach'a'o'ayi an Jesús chi ixta'ilhtuniya li tu'u akxni ixt'awnachalh Galileaj; chi ali'inchá t'akunin yu wachu ixtat'a'anta Jerusalén ancha wachu ixtayanalh.

Maknukalh an Jesús

⁴² Ta'oxalhcha, chi mu akxniy ixmala'asijnikan para li kajastaknankana katunkunanta, ⁴³ an José, jamacha'a Arimatea jantu talhanan, la'alhi an Pilatoj, kisk'inilhi an ixlakatunaj an Jesús. Mu yucha wachu ixpaxan'iya an ixlich'alhkat an Dios, chi yucha wachu ay lapanaki ixjunita an tan ix'alín lakchiwinti laka ay juntaj. ⁴⁴ Jantu ixliwilayi an pilatoj li ixnitacha an Jesús, pus t'asanilhi

an ixcapitank'an an soldadojnin chi lhisakmilhcha. ⁴⁵ An capitán juniya li chun sawalh, pus an José makawnikalhcha an ixlakatunaj an Jesús. ⁴⁶ Ixtamajutacha alhtam sábanaj, yuchacha pula'apamililh akxni ma'alhtajulhcha, chi maknulhcha tanchun ixtantilhpatakanta laktalhpa, an tan ixputanukan yawnilhcha aya chiwx. ⁴⁷ An María Magdalena chi an María ixnati José tala'ts'ini tan maknukalh.

La'awcho'ot

16 ¹ La'puslichá an wilhchan akxni jastaknankan, an María Magdalena chi an María ixnati Jacoboj, chi an Saloméj, takilaktamawlhcha laklhaklhi perjumej yu kata'ana lakamuk'anin an ixlakatunaj an Jesús. ² Pus ixlila'atamcha wilhchan a'taynicholh samanaj, sawalhka wats'isin, ta'alhcha an tan aknuay an Jesús, chi jask'u-nulhcha. ³ Talajuni:

—¿Tisiyuchacha akintama'osuniyan an chiwx an tan putanukani?

⁴ Walh akxni tacha'alh, tala'ts'in mala'xtinukanta an aya chiwx. ⁵ Chi tatanuchalh tala'ts'in ch'up'e' wilh pumatam ts'alh, lhilaka oxi ixpa'xti an puta'aknun, wanaj lhmani an sut'ut'u ixla'ch'it, pus ixtalaktalhanancha.

⁶ Yucha jajuniy:

—Jant'u k'alakt'alhanant'it; ¿yucha an ka tamakxtuk-muk'alh Jesús jamacha'a Nazareti p'uxk'awyat'it? yucha la'awcho'olhcha, tucha tu'u tanun; jo' k'ala'ts'int'it, tucha tu'u malh an tan ixtamamata. ⁷ K'ajak'i'unit'iti an ixt'alhtanan chi an Pedroj, li yucha katatap'ulhniyani an Jesús ka'ana xalakaat'un Galileaj; ancha k'ala'ts'int'achi'it tacha tajunin.

⁸ An t'akunin so'ojo tataxtulh mu ixtalaktalhanancha, wa xk'ip'ip'icha ixtalay; tu k'is xamati tu'u ixtajuni mu ixtalaktalhanancha.

An Jesús talakasunilh an María Magdalena

⁹ Mu ixla'awcho'otacha wats'isin an Jesús, yu ixlila'atamcha wilhchan a'taynicho'olh samanaj, yucha an María Magdalenajcha p'ulhnaj talakasunilh, yu ixk'uch'uta akxni ixtala'apaxto'ta la'atujun makxkay'un. ¹⁰ Pus yucha alh jamak'atsaanini an ixt'alhtanan an Jesús, tan ixtalhita'oxila'alhi chi ixtalhi'alhun. ¹¹ Akxni ta'alha'asmatlhi an María Magdalena, li t'ajuni an Jesús chi li la'tsilh, jantu takiklaka'ilh.

Jatalakasuni ixt'uyunk'an ixt'alhtanan an Jesús

¹² La'puslichia panch'e'ex, an Jesús tamcha jalhitalakasunipalh ixt'uyunk'an ixt'alhtanan, akxni ixtat'ajun tanchun laka tij, tan ma'at lhitamakajun an la'acha'an. ¹³ Chi yu'uncha wachucha tat'alajunilhi an ali'in ixt'alhtanank'an; walh wachu jantu jakiklaka'ikalh.

An Jesús jamala'achalhi an ixt'alhtanan

¹⁴ Xli'astan jatalakasunilhcha an Jesús an ixpumakaw-tamk'an ixt'alhtanan akxni ixtalakwilanan'olh laka mesaj, chi jalaj'aymalhi mu ntu ixtat'alakiklaka'iya an ali'in li ixtala'ts'intacha li ixla'awcho'otacha, mu sawalhcha lakt'ak'alha ixtajuninita an ixjalhunutk'an. ¹⁵ Chi jajuniy: —K'ap'inchi'it'iti ta ixlijalhi'ay an lakamunulhpa chi ixchuxk'ani k'ajalak'unit'it an lapanakni an laj'oxi chiwinti. ¹⁶ Yu kakiklaka'iya chi ka'a'paxa, kata'alhtaxtuya'; pero yu ntu katikiklaka'ilh, kala'a'iya lhima'alh'ajna. ¹⁷ Chunchuniya katamasuya an yu tajakiklaka'inin: layi katak'uch'uya la kintalakask'i an yu wa tala'apaxt'o'a makxkay'un, chi layi katachiwinina tipalhuw tumpaj chiwinti. ¹⁸ Layi katach'apayanta tsapulin, chi masi kata'otlhi venenoj, tu katitalhinilh; katalakpach'apaya an ta'an'anin, chi katatak'uch'uya'.

Tach'ixlixa an Jesús

¹⁹ Xli'astan jaxa'ala'olh an Jamach'alhkat Jesús, lhi'ankalhcha an lakt'iyan, piktutawlhchalhcha tan oxi ixpa'xti an Dios. ²⁰ Chi yu'uncha an ixt'alhtanan tataxtunilhcha talhichiwiniy an ixchiwinti Dios, ta ixlijalhi'ay, chi an Jamach'alhkat Jesús ixja'a'tayjuycha, ixjamasunicha an lapanakni li an ixchiwinti Dios sawalh, tacha an ixtala'ts'inha yu la'lhi'a'nin tanlhun ixlaktapasay. Chunchacha kawalh.